

যায়াকানন

ଆତ୍ମାକାନ୍ଦ

ଶ୍ରୀ ହେମେନ୍ଦ୍ରକୁମାର ରାୟ

୧୭୭୬

প্রকাশক
শ্রীসত্যেন্দ্রকুমার বসু
ডি, এম, লাইব্রেরী
৬১, কর্ণওয়ালিস ষ্ট্রীট,
কলিকাতা ।

মূল্য পাঁচসিকা মাত্র

প্রবাসী প্রেস
৯১, আগার সাকুলার রোড,
কলিকাতা
শ্রীসজনীকান্ত দাস কর্তৃক মুদ্রিত ।

কন্যা

শ্রীমতী পুষ্পমালার করকমলে

বাবার

আদরের উপহার

পূর্ব-কথা

বিনয়বাবুর ডায়ারিতে যে অদ্ভি-আশ্চর্য ঘটনাটি আছে, তা পড়বার আগে একটুখানি পূর্ব-ইতিহাস জানা দরকার।

যুরোপ-আমেরিকার পণ্ডিতরা যে আজকাল ‘মাস’ বা মঙ্গলগ্রহে যাবার চেষ্টা করছেন, এ খবর এখন বোধ হয় পৃথিবীর কারুর কাছেই অজানা নেই।

পণ্ডিতদের মতে, মঙ্গল গ্রহে একরকম জীবের বসতি আছে, তাদের চেহারা মানুষের মতন না হ’লেও মানুষের চেয়ে তারা কম-বুদ্ধিমান নয়। অনেকের মতে তাদের বুদ্ধি মানুষেরও চেয়ে বেশী। কিন্তু পণ্ডিতদের কথা এখন থাক।

... .. মঙ্গল গ্রহ থেকে আশ্চর্য্য এক উড়ো-জাহাজে চ’ড়ে একদল বেয়াড়া আকারের বামন জীব একবার পৃথিবীতে বেড়াতে এসেছিল।

যাবার সময়ে অদ্ভুত উপায়ে তারা অনেক মানুষকে মঙ্গলগ্রহে ধ’রে নিয়ে গিয়েছিল।

বন্দীদের ভিতরে ছিল বিমল, কুমার ও রামহরি—
যাঁরা “যকের ধন” উপন্যাস পড়েছেন তাঁদের কাছে এরা
অপবিচিত নয়। বিনয়বাবু ও কমলও বন্দী হয়েছিল—
এবং সঙ্গে ছিল কুমারের বড় আদরের বাঘা কুকুর।

বিনয়বাবু বয়সে প্রৌঢ়,—নানা বিষয়ে জ্ঞান তাঁর
অগাধ। অনেক বৈজ্ঞানিক তথ্য তাঁর নখদর্পনে।
দলের সকলেই তাঁকে মান্ত ও শ্রদ্ধা করত।

বিমল, কুমার ও কমল বয়সে যুবক। বিমলের
সাহস ও বাহুবল অসাধারণ।

রামহরি হচ্ছে বিমলের পুরানো চাকর।

অন্যান্য বন্দীদের পরিচয় আপাততঃ অনাবশ্যক।

মঙ্গলগ্রহে যে-সব রোমহর্ষক ও আশ্চর্য ঘটনা
ঘটেছিল, বিনয়বাবুর ডায়ারিতে তা লেখা আছে।
ডায়ারির সেই কাহিনী “মেঘদূতের মর্তে আগমন” নামে
১৩৩২—১৩৩৩ সালের “মৌচাকে” ধারাবাহিক ভাবে
প্রকাশিত হয়ে গেছে।

“মায়াকানন” বা “ময়নামতীর মায়াকানন”ও
১:৩৩—১৩৩৪ সালের “মৌচাকে” প্রকাশিত হয়েছিল।

যদিও এটি সম্পূর্ণ নূতন এক উপন্যাস, তবু এর
আরম্ভ হয়েছে “মেঘদূতের মর্তে আগমনে”র শেষ
পরিচ্ছেদের শেষ অংশ থেকে।

বুদ্ধি ও শক্তিতে পরাস্ত হয়ে মঙ্গলগ্রহের বামনরা শেষটা বন্দী মানুষদের হাতেই বন্দী অবস্থায়, উড়ো-জাহাজ নিয়ে পৃথিবীতে আসতে বাধ্য হইয়াছিল।

বিনয়বাবুর ডায়ারির সেই স্থানটি আমি এখানে উদ্ধার ক'রে দিলাম। :—

“ঐ ফুটে উঠছে ভোরের আলো,—পূর্ব-আকাশের তলায় আশার একটি সাদা রেখার মত। আকাশের বৃকে তখনো রাতের কালো ছায়া ঘুমিয়ে আছে এবং সামনের দৃশ্য তখনো অন্ধকারের আস্তরণে ঢাকা। তবে, অন্ধকার এখন অনেকটা পাতলা হয়ে এসেছে বটে!

মুখ বাড়িয়ে দেখলুম, পৃথিবীর সমস্তই আবছায়ার মতন,—এখনো গাছপালার সবুজ রং চোখের উপরে ভেসে ওঠে-নি।

বিমল, কুমার, কমল ও রামহরি আর থাকতে পারলে না, তারা তখনি উড়োজাহাজ ছেড়ে নেমে পড়ল। আমিও নীচে নামলুম—বাধাও আমাদের সঙ্গ ছাড়লে না।

আঃ, কি আরাম! এতকাল পরে পৃথিবীর প্রথম স্পর্শ, সে যে কি মিষ্টি! মাটিতে পা দিয়েই টের পেলুম, আমরা স্বদেশে ফিরে এসেছি!

কমল তড়াক ক'রে এক লাফ মেরে বললে, “হ্যাঁ, এ

আমাদের পৃথিবীই বটে! এক লাফে আমি আর তিন
তলার সমান উঁচু হ'তে পারলুম না তো!”

খানিক তফাতে হঠাৎ কি-একটা শব্দ হ'ল—ছড়ুম,
ছড়ুম, ছড়ুম! যেন ভীষণ ভারি পায়ের শব্দ!

আমরা সচমকে সামনের দিকে তাকালুম!
অন্ধকারের আবরণ তখনো স'রে যায়-নি, তবে একটু
দূরে প্রকাণ্ড একটা চলন্ত পাহাড়ের কালো ছায়ার মত
কি-যেন চ'লে যাচ্ছে ব'লে মনে হ'ল!

বাঘা ভয়ানক জোরে ডেকে উঠল, আমরা সবাই
স্তুস্তিতের মত দাঁড়িয়ে রইলুম!

নিজেদের চোখকে যদি বিশ্বাস করতে হয়, তাহ'লে
বলতে পারি, আমাদের সুমুখ দিয়ে যে-জীবটা চ'লে
যাচ্ছে, সেটা তালগাছের চেয়ে কম-উঁচু হবে না! তার
পায়ের তালে দেহের ভারে পৃথিবীর বুক ঘন ঘন কেঁপে
উঠছে!... ..

মহাকায় জীবটা কোথায় মিলিয়ে গেল, কিন্তু তার
চলার শব্দ তখনো শোনা যেতে লাগল—ছড়ুম, ছড়ুম,
ছড়ুম!

বিমল শুষ্ক স্বরে বললে, “বিনয়বাবু!”

—“আঁা?”

—“ওটা কি?”

—“অন্ধকারে তো কিছুই দেখতে পেলুম না !”

—“কিন্তু যেটুকু দেখলুম, তাইই কি ভয়ানক নয় ?
এ আমরা কোথায় এলুম ?”

—“পৃথিবীতে ।”

—“কিন্তু এইমাত্র যাকে দেখলুম, সে কি পৃথিবীর
জীব ?”

আমিও অবাক হয়ে ভাবতে লাগলুম । ওদিকে
আকাশের কোলে শুয়ে উষার চোখ ক্রমেই ফুটে উঠতে
লাগল !

যায়াকাননঃ

(বিনয়বাবুর ডায়ারি)

এক

অপূর্ণ পৃথিবী

উষার চোখ ক্রমেই ফুটে উঠছে !... .. কিন্তু পৃথিবী তখনো আপনার বুকের উপর থেকে আনছায়ার চাদরখানি খুলে রেখে দেয়-নি !

যেদিকে সেই মহাকায় জীবটা চ'লে গেল, সেই দিকে হতভয়ের মতন তাকিয়ে আমরা কয়জনে চুপ ক'রে দাঁড়িয়ে আছি !

আচম্বিতে আর এক পরিচিত শব্দে আমরা সকলেই চমকে উঠলুম ! যেন হাজার হাজার শ্লেটের উপরে কারা হাজার হাজার পেন্সিল টানছে আর টানছে !

মাস্তাকানন

এক লহমায় আমাদের আড়ষ্ট-ভাব ঘুচে গেল !

কুমার সর্বাগ্রে চেষ্টায়ে উঠল, “বামনদের উড়োজাহাজ !”

বিমল বললে, “সে কি কথা !. উড়োজাহাজ তো বিকল হয়ে পৃথিবীতে এসে নেমেচে, মেরামত না করলে আর উড়তে পারবে না !”

রামহরি আকাশের দিকে হাত তুলে বললে, “এ দেখ খোকাবাবু !”

আমাদের চোখের সামনে দিয়ে বিপুল একটা কালো ছায়া ঠিক বিছ্যতের মতন বেগে আকাশের দিকে উঠে যাচ্ছে !—হ্যাঁ, এ মঙ্গলগ্রহের উড়োজাহাজই বটে !

কুমার বললে, “কি সর্বনাশ ! অনেক মানুষ বে ওর মধ্যে আছে !”

কমল তাড়াতাড়ি বললে, “কুমারবাবু, বন্দুক ছুঁড়ুন—বন্দুক ছুঁড়ুন !”

বিমল হতাশ ভাবে বললে, “আর মিছে চেষ্টা ! বামনরা আমাদের চোখে ধুলো দিয়েচে, উড়োজাহাজ বন্দুকের সীমানার বাইরে চলে গেছে !”

এরি-মধ্যে উড়োজাহাজখানা আকাশের গায়ে প্রায়

মিলিয়ে যাবার মতন হ'য়েছে—না-জানি কতই বেগে সে উড়ে চলেছে !

ভোরের আলো তখন মাটির বুকেও নেমে এসেছে এবং অন্ধকার স'ঙ্গে যাচ্ছে বন-জঙ্গলের ভিতর দিকে !

আমি বললুম, “বামনরা যে কি ক'রে চম্পট দিলে কিছুই ভো বুঝতে পারি না, অতগুলো লোককে আমরা তো তাদের উপরে পাহারায় রেখে এসেছি !”

বিমল বললে—“বোধ হয় বন্দুক নিয়ে আমরা চলে আসাতেই বামনদের সাহস বেড়েছে, তারা মানুষদের আক্রমণ করেছে !”

—“সম্ভব । কিন্তু এখানে দাঁড়িয়ে থেকে আর লাভ নেই, চল, যেখানে উড়োজাহাজ এসে নেমেছিল, সেখানটা একবার দেখে আসি !”

জায়গাটা বেশী দূরে নয় ! আমরা যেদিক থেকে এসেছিলুম আবার সেইদিকেই এগিয়ে চললুম ।

তখন চারিদিক দিব্য ফরসা হয়ে এসেছে । কিন্তু চোখের সূমুখে যে সব দৃশ্য দেখছি তা একেবারে অভাবিত ও অপূৰ্ব !

পশ্চিমদিকে পাহাড়ের উপর পাহাড় মাথা তুলে দাঁড়িয়ে ভোরের আলোতে প্রাতঃস্নান করছে !

মায়াকানন

পাহাড়গুলোর উপরে উদ্ভিদের চিহ্নমাত্র নেই, কিন্তু তাদের তলাতেই অনাদিকালের নীল অরণ্য !

পূর্বদিকে মস্ত-একটা প্রান্তর ধূ ধূ করছে—মাঝে মাঝে এক-একটা গাছের কুঞ্জ ; কিন্তু আশ্চর্য্য এই যে, অত-বড় মাঠের কোথাও একগাছা ঘাসের নামগন্ধও নেই । মাঠের একপাশ দিয়ে একটা চিক্চিকে রেখা একে বঁকে কোথায় চ'লে গেছে—নিশ্চয়ই নদী ।

উত্তরদিকেও বন-জঙ্গল আর গাছপালা । অধিকাংশ গাছই ছোট ছোট, এবং তাদের আকার এমন অদ্ভুত যে, পৃথিবীর কোন গাছের সঙ্গেই মেলে না ।

দক্ষিণদিকে গাছপালার ফাঁকে ফাঁকে দেখা যাচ্ছে, অনেক দূরে জলের উপরে সূর্য্য-কিরণের ঝিকিমিকি ! জলের নীল রং দেখে আন্দাজ করলুম, সমুদ্র ।

আমাদের পায়ের তলাতে যে জমি রয়েছে তা অত্যন্ত কঠিন, প্রায় পাথর বললেই চলে—সেখানেও ঘাসের চিহ্ন নেই । মাঝে মাঝে এক-একটা ঝোপের ভিতরে অজানা নানারকম আশ্চর্য্য ফুল ফুটে আছে, সে-সব ফুলের কোনটারই আকার ছোট নয়, আর তাদের সকলেরই বোঁটায় বড় বড় কাঁটা !

বিমল কৌতূহলী চোখে চারিদিকে চাইতে চাইতে

বললে, “কি আশ্চর্য্য বিনয়বাবু, এ আমরা কোন দেশে এলুম? এমন ভোরের বেলা, অথচ একটা পাখী পর্য্যন্ত ডাকচে না!”

কুমার বললে, “এমন বন-জঙ্গল, অথচ একটা ফড়িং কি প্রজাপতি পর্য্যন্ত উড়চে না!”

বাস্তবিক, এ বড় অসম্ভব ব্যাপার! চারিদিকে কোথাও কোন্ জীবের সাড়া বা চিহ্ন নেই!

আমি বললুম, “এ যেন ময়নামতীর মায়াকানন!”

কমল বললে, “সে আবার কি?”

—“প্রাচীনকালে বাংলা দেশে মণিকচন্দ্র ব’লে এক রাজা ছিলেন। ময়নামতী তাঁর রাণী। প্রবাদ আছে, ময়নামতী ডাকিনী-বিদ্যা শিখে গুরুর বরে অমর হ’য়েচে। এখানে এসে আমার মনে হচ্চে, এ যেন সেই ময়নামতীর মায়াপুরী—কীটপতঙ্গ পশুপক্ষী পর্য্যন্ত ভয়ে এখানে দেখা দেয় না!”

রামহরি এতক্ষণ সকলের আগে আগে পথ চলছিল, আমার কথা শুনেই সে মুখ শুকিয়ে সকলের পিছনে এসে দাঁড়াল!

আমি হেসে বললুম, “কি হ’ল হে রামহরি, হঠাৎ পিছিয়ে পড়লে কেন?”

মায়াকানন

—“আজ্ঞে, আপনার কথা শুনে।”

—“কেন, কি কথা?”

—“ঐ যে বললেন এ বন হচ্ছে ময়নামতীর মায়াকানন! বুড়ী ময়নার গল্প আমিও জানি বাবু! সে বনকে সহর করত, সহরকে বন করত, ভেড়াকে মানুষ আবার মানুষকে ভেড়া বানাত! যত ভূত-প্রেত আর ডাকিনী-যোগিনী আর কথায় উঠত-বসত।”

—“রামহরি, এত সহজে তুমি ভয় পাও কেন? আমি যা বললুম তা কথার কথা মাত্র!”

—“ভয় পাই কি সাধে? যে বিপদ থেকে সবে পার পেয়েছি, আমি আর কিছুই অসম্ভব মনে করি না! কে জানে এ আবার কোন্ মুল্লুকে এলুম—পৃথিবীর সঙ্গে এর তো কিছুই মিলচে না। যেখানে পাখা নেই, প্রজাপতি নেই, ফড়িং নেই, সে কি পৃথিবী? এই শেষ-রাতে চোখের সামনে দিয়ে পাহাড়ের মতন কি-একটা চলে গেল, পৃথিবীতে কি সে-রকম কোন জীব থাকে?”

আমি আর কোন জবাব দিলাম না। রামহরির ভয় হাস্যকর বটে, কিন্তু তার যুক্তি অসঙ্গত নয়।

বিমল বললে, “বিনয়বাবু, আমাদের উড়োজাহাজ

কোথায় এসে নেমেছিল, আমরা বোধ হয় তা আর ঠিক করতে পারব না।”

আমি বললুম, “আমারও তাই মনে হ’ছে। অন্ধকারে আমরা কোথায় নেমেছিলুম এখন তা আর বোঝা শক্ত।”

রামহরি দরদ-ভরা গলায় বললে “আহা, উড়ো-জাহাজের ভেতরে যে মানুষগুলো ছিল, তাদের দশা কি হবে?”

কমল বললে, “যার অদৃষ্টে যা আছে! তাদের আবার মঙ্গল গ্রহে ফিরে যেতে হবে,—আর কি!”

কুমার বললে, “এখন ও-সব বাজে কথা রেখে নিজেদের কথা ভাবো। আমাদের অদৃষ্টও খুব উজ্জ্বল বলে মনে হচ্ছে না। কিন্তু ও কি! বিমল, বিমল!”

আমরা সকলেই স্পষ্ট দেখলুম, অল্পদূরেই বনের এক অংশ উপর থেকে তলা পর্য্যন্ত ছলছে! তার পরেই দেখা গেল, বনের উপরে চূড়ার মতন খুব-উঁচু একটা গাছ বার ছয়েক ছলেই মড়্ মড়্ শব্দে ভেঙে প’ড়ে অদৃশ্য হয়ে গেল!

বিমল বিস্মিতভাবে বললে, “অতখানি জায়গা জুড়ে বন ছলচে—কে ওখানে আছে?”

মাস্তাকানন

কুমার বললে, “এখন ঝড়ও নেই, জোরে হাওয়াও বইচে না। তবে অত-বড় গাছ এত সহজে ভাঙলে কে ?”

বাঘা একবার ঘেউ ঘেউ ক’রে ডেকে উঠল, তারপর ছুটে সেই বনের ভিতরে গিয়ে ঢুকল !

আমার গা কেমন শিউরে শিউরে উঠতে লাগল। আমি বিজ্ঞানকে মানি, এবং বিজ্ঞান যে অনেক অসম্ভব ব্যাপারকে সম্ভব করেছে তাও আমি জানি,—কিন্তু এখানে এসে যে-সব কাণ্ড দেখছি তার তো কোনই হৃদিস্ পাচ্ছি না ! এ আমাদের চোখের ভ্রম, মনের ভ্রম,—না সত্যই কোন অলৌকিক ব্যাপার ?

হঠাৎ দেখলুম বাঘা তীরের মতন বেগে বনের ভিতর থেকে বেরিয়ে এল ! তার ল্যাজ পেটের তলায় গুটানো, আর তার চোখছুটো বিষম ভয়ে যেন ঠিকরে বেরিয়ে পড়তে চাইছে ! সে এসেই বিমলের পায়ের তলায় মুখ গুঁজড়ে গুয়ে পড়ল !

বিমল তার মাথা চাপড়াতে চাপড়াতে বললে, “বাঘা তো কখনো ভয় পায় না ! সে এমন কি দেখেছে ?”

আমি গস্তীর স্বরে বললুম, “বিমল, এ জায়গা বড়

সুবিধের নয় । এস, এখান থেকে আমরা চ'লে যাই—
একটা মাথা গৌজবার ঠাই খুঁজতে হবে তো !”

বিমল একবার বাঘা, আর একবার বনের দিকে
তাকিয়ে জড়িত স্বরে বললে, “কিন্তু বনের ভিতরে কি
আছে,—বাঘা কি দেখে এত ভয় পেয়েছে ?”

দুই

বোম্বাই ফড়িং

আমরা সেই ভয়াবহ অরণ্য থেকে পালাবার জন্যে
তাড়াতাড়ি অগ্রসর হ'তে লাগলুম।

চলতে চলতে বার বার পিছনে তাকিয়ে সেই একই
দৃশ্য দেখলুম—বনের এক জায়গায় গাছপালা অত্যন্ত
অস্বাভাবিক ভাবে ছলছে আর ছলছে! কেন
ছলছে, কে দোলাচ্ছে?

বাঘা আমাদের পায়ে পায়ে জড়িয়ে চলতে লাগল,
কিন্তু ভয়ে সে তখনো জড়সড় হয়ে আছে!

বনের ভিতরে কী যে বিভীষিকা লুকিয়ে আছে
এবং বাঘা যে কি দেখে ভয়ে অমন মুসড়ে পড়েছে,
অনেক ভেবেও তার কোন হৃদিস পেলুম না!

কুমার বললে, “আমার বাঘা বাঘ দেখেও ভয় পায়

না। কিন্তু এর অবস্থাটাই যখন এমন কাহিল হয়ে পড়েছে, তখন এটা বেশ বোঝা যাচ্ছে যে, বনের ভিতরে নিশ্চয়ই কোন ভয়ঙ্কর কাণ্ড আছে।”

বিমল দাঁড়িয়ে পড়ে বললে, “চুপিচুপি ওখানে গিয়ে আমি একবার দেখে আসব কি?”

আমি তাড়াতাড়ি ডানপিটে বিমলের হাত চেপে ধরে বললুম, “তুমি কি পাগল হলে বিমল? বিপদকে যেচে ডেকে আনবার কোন দরকার নেই!”

বিমল বললে, “আচ্ছা, আপনি যখন মনো করছেন, তখন আর যাব না।”

আমরা আবার অগ্রসর হলুম। আশে-পাশে আরো অনেক ঝোঁপ, জঙ্গল আর বন রয়েছে। কেন জানি না, সেগুলোর পাশ দিয়ে যেতে যেতে আমার বুকটা কেমন ছাঁৎ-ছাঁৎ করে উঠতে লাগল। প্রতি পদেই মনে হতে লাগল, ঐ-সব বন-জঙ্গলের মাঝখানে সান্ধ্য যুত্মা যেন আমাদের আপক্ষায় ওঁৎ পেতে বসে আছে। এক জায়গায় শুনতে পেলুম, বনের ভিতরে আবার সেই রকম ধপাস্-ধপাস্ করে শব্দ হচ্ছে এবং প্রতি শব্দের সঙ্গে সঙ্গে পৃথিবীর বুক কেঁপে কেঁপে উঠছে—বনের ভিতরে যেন কোন পর্বতপ্রমাণ দানব

মাস্তাকানন

আপন মনে এধারে-ওধারে চলা-ফেরা ক'রে বেড়াচ্ছে
যার পায়ের শব্দেই পৃথিবী কাঁপে, না জানি তার
আকার কি ভয়ানক ! একবার সে যদি মানুষের গন্ধ
পায়, তাহ'লে আর কি আমাদের রক্ষা আছে ?

আরব্য উপন্যাসের সিন্দবাদ একবার এক দৈত্যের
কবলে পড়েছিল। গলিভার সাহেবের ভ্রমণ-
কাহিনীতেও দৈত্য-মুল্লুকের কথা আছে। তবে কি সে-
সব গল্প কাল্পনিক নয়, আমরা কি সত্যই কোন
দৈত্যদের দেশে এসে পড়েছি ? কিন্তু এ কথায় আমার
মন বিশ্বাস করতে চাইলে না।

বিমল বললে, “বিনয়বাবু, আমরা তো কেউ
এখানকার কিছুই চিনি না। কোন্ দিক নিরাপদ কি
ক'রে আমরা তা জানতে পারব ?”

বিমলের কথা সত্য। আমি চেয়ে দেখলুম, দক্ষিণ
দিক—অর্থাৎ যেদিকে সমুদ্র আছে, সেদিকটা বেশ
ফাঁকা। সেদিকে বনজঙ্গল নেই, কাজেই কোন
লুকানো বিপদেরও ভয় নেই। তার উপরে দক্ষিণ-
পশ্চিম দিকে খুব বড় একটা পাহাড়ও আছে। মঙ্গল-
গ্রহের মত এখানেও আমরা ঐ পাহাড়ের ভিতরে
আশ্রয় নিতে পারব। সকলকে আমি সেই কথা

বললুম। সকলেই আমার প্রস্তাবে রাজি হ'ল।
আমরা তখন সেই পাহাড়ের দিকে অগ্রসর হলাম।

পাখী নেই, প্রজাপতি নেই, মানুষের সাড়া নেই,
চারিদিকে খালি বন আর পাহাড় আর সমুদ্র! আমার
মনে হ'ল, আমরা যেন বৈজ্ঞানিকদের পৃথিবীর
সেই বাল্যকালে ফিরে এসেছি—যখন মানুষের নামও
কেউ শোনে-নি, যখন পৃথিবীতে বাস করত শুধু
প্রকাণ্ড, কিন্তুতকিমাকার, আশ্চর্য্য সব জানোয়ার!

আকাশের দিকে তাকিয়ে দেখলুম,—অনেক—
অনেক উঁচুতে একঝাঁক পাখী উড়ে যাচ্ছে। তাহ'লে
এদেশেও পাখী আছে! তাড়াতাড়ি আমি সকলের দৃষ্টি
সেইদিকে আকর্ষণ করলুম।

বিমল বললে, “কিন্তু ওগুলো কি পাখী?”

কুমার বললে, “চিল।”

কমল বললে, “ঈগল।”

আমি বললুম, “কিন্তু চিল কি ঈগলের ডানা তেঁ;
অত বড় হয় না!”

রামহরি বললে, “ওদের ল্যাজ কি-রকম দেখুন!”

তাইতো, তাদের ল্যাজগুলো চতুষ্পদ জীবের মত
যে! কি পাখী ও গুলো?

মাস্তাকানন

ভালো ক'রে দেখবার আগেই পাখীর ঝাঁক ক্রমে
দূরে মিলিয়ে গেল !

হঠাৎ পিছন থেকে কমল আর্তনাদ ক'রে উঠল !
চকিতে ফিরে দেখি, কমলের পিঠের উপরে একটা
অদ্ভুত আকারের জীব এসে বসেছে আর কমল
প্রাণপণে সেটাকে পিঠ থেকে ঝেড়ে ফেলবার চেষ্টা
করছে, কিন্তু কিছুতেই পারছে না !

আমরা সকলে মিলে জীবটাকে মেরে ফেললুম ।
অদ্ভুত জীব ! দেখতে মস্তবড় একটা ফড়িংয়ের মত—
প্রায় একহাত লম্বা । কিন্তু তার মুখে সাঁড়াশীর মত
ছুখানা বড় বড় দাঁড়া রয়েছে আর তার দেহের দুই-
ধারেও রয়েছে ছুখানা ক'রে চারখানা হাত-দেড়ক
লম্বা ডানা !

রামহরি বললে, “ও বাবা, এষে বোম্বাই-ফড়িং !”

কমলের দিকে চেয়ে দেখলুম, তার ঘাড়ের পিছনে
ফিন্‌কি দিয়ে রক্ত ছুটছে !

কুমার হঠাৎ চৈঁচিয়ে, একদিকে আঙুল তুলে
বললে, “দেখ, দেখ !”

সেদিকে তাকাতেই দেখি গাছপালার ভিতর থেকে
পালে পালে বোম্বাই-ফড়িং বেরিয়ে আসছে !

স্বাক্ষর

আমি বললাম, “পালাও, পালাও। ওরা আমাদের
দেখতে পেলো আমরা কেউ আর বাঁচব না!”

সবাই বেগে দৌড়োতে লাগলাম—কড়িং দেখে এর
আগে মনুষ্য বোধ হয় আর কখনো পালাননি!

তিন

শেঠের ভাবনা

এই তো সমুদ্রতীর ! উপরে নীলপদ্মের রং-মাখানো অনন্ত আকাশ, নীচে পৃথিবী-দেবীর পরোনের নীলাশ্বরীর মতন অনন্ত নীল-সায়রের লীলা !

সমুদ্রের বুকের উপরে ব'সে সূর্যের আলো হাজার হাজার হীরা-মাণিক নিয়ে যেন ছিনিমিনি খেলছে, আমরা ব'সে ব'সে খানিকক্ষণ তাই দেখতে লাগলুম !

বিমল প্রথমে কথা কইলে। সে বললে, “বিনয় বাবু, এখন উপায় ?”

—“কিসের উপায় ?”

—“আমরা যে পৃথিবীতেই এসেছি, তাতে আর সন্দেহ নেই। কিন্তু এ কোন্ দেশ, এখান থেকে কোন্ দিকে, কত দূরে মানুষের বসতি আছে, তা আমরা জানি না। এখানে থাকাও সম্ভব নয়, কারণ কি গেয়ে বেঁচে থাকব ?”

আমি বললুম, “চেষ্টা করলে বনের ভিতরে শিকার মিলতে পারে।”

বিমল বললে, “হ্যাঁ, মিলতে পারে, কিন্তু তাও বন্দুকের টোটা না ফুরোনো পর্য্যন্ত।”

—“বিমল, টোটা ফুরোবার আগেই আমরা যে এ দেশ থেকে পালাবার পথ খুঁজে পাব না, এমন মনে করবার কোন কারণ নেই।”

—“কিন্তু শিকার পেলেও আমরা রাখিব কি ক’বে? আমাদের সঙ্গে দেশলাই নেই, আগুন ছালতে পারব না।”

—“তা হ’লে আমাদের কাঁচা মাংস খাওয়াই অভ্যাস করতে হবে। মন্দ কি, সেও এক নূতনত্ব!”

রামহরি বললে, “বাবু, ভয় নেই, আপনাদের কাঁচা মাংস খেতে হবে না, আমি আপনাদের রোঁধে খাওয়াব!”

আমি আশ্চর্য্য হয়ে বললুম, “তুমি কোথা থেকে আগুন পাবে?”

রামহরি বললে, “কেন, ঐ পাহাড়ের পাশ দিখে আসতে আসতে আপনারা কি দেখেন নি, কত ছোট বড় চক্‌মকি পাথর পড়ে রয়েছে!”

মাস্তাকানন

আমি আশ্বস্ত হয়ে বললুম, “যাক্, তাহলে আমাদের একটা বড় ভাবনা দূর হ’ল। ইম্পাতের জন্তে ভাবতে হবে না, আমাদের সঙ্গে ছোরা-ছুরি আছে, তাই দিয়েই কাজ চালিয়ে নেব।”

বিমল পেটের উপরে হাত বুলোতে বুলোতে বললে, “ও বিনয়বাবু, শুনেই যে আমার ক্ষিধে পেয়ে গেল! এখন খাই কি?”

আমি হেসে বললুম, “শিকার না পেলে আমাদের হাওয়া খেয়েই বেঁচে থাকবার চেষ্টা করতে হবে।”

কুমার বললে, “কেন বিনয়বাবু, খাবার তো আমাদের সামনেই রয়েছে, হাত বাড়িয়ে নিলেই হয়!”

বিমল বললে, “সামনে! কোথায়?”

কুমার বললে, “ঐ দেখ!”

চেয়ে দেখলুম, আমাদের স্তম্ভে বালির উপরে, অনেকখানি জায়গা জুড়ে হাজার হাজার গর্ত আর প্রত্যেক গর্তের সামনে বসে রয়েছে এক-একটা লাল রঙের কাঁকড়া!

বিমল মহা-উল্লাসে একটা লাফ মেরে বললে, “কি আশ্চর্য্য, এতক্ষণ আমি দেখতে পাই-নি!”

আমরা সকলেই কাঁকড়া ধরতে ছুটলুম। কিন্তু

খানিকক্ষণ ছুটাছুটি ক'রেই বুঝলুম, কাজটা মোটেই সহজ নয়! তাদের কাছে যেতে না যেতেই তারা বিছাতের মতন গর্তের মধ্যে ঢুকে পড়ে, কিছুতেই ধরা দেয় না! তারা কেউ আত্মসমর্পনে রাজ্য নয় দেখে. আমরা শেষটা গর্ত খুঁড়ে তাদের গোটাকতককে অনেক কষ্টে বন্দী করলুম।

গর্ত খুঁড়তে-খুঁড়তে কমল হঠাৎ একরাশ ডিম আবিষ্কার করলে! মোট একশোটা ডিম!

আমি সানন্দে বললুম, “বাস্, আর আমাদের খাবারের ভাবনা নেই! এগুলো কাছিমের ডিম!”

কমল বললে, “কাছিমের ডিম কি মানুষ খায়?”

—“নিশ্চয়ই খায়! দক্ষিণ আমেরিকার কোন কোন স্থানে কাছিমের ডিম আর মাংসই হচ্ছে মানুষের প্রধান খাদ্য! এখানে যখন কাছিমের ডিম পাওয়া গেছে, তখন আজ রাত্রে আমরা কাছিমও ধরতে পারব।”

বিমল বললে, “তাহলে দেখা যাচ্ছে, ভাগ্যদেবী এখনো আমাদের উপরে একেবারে বিমুখ হন-নি!”

কুমার বললে, “আর তো তর সইচে না—আগুন জ্বালো, আগুন জ্বালো!”

চার

সাগর-দানবের পাঞ্জায়

পাহাড়ের উপরে এখানেও একটা গুহা খুঁজে নিতে আমাদের বেশী দেরি লাগল না। এ গুহাটির সবচেয়ে সুবিধা এই যে, এর ভিতরটা বেশ লম্বা-চওড়া হ'লেও মুখটা এমন ছোট যে হামাগুড়ি না দিয়ে ভিতরে ঢুকবার উপায় নেই। কাজেই আত্মরক্ষার পক্ষে গুহাটি খুবই উপযোগী।

সমুদ্র-তীরে যেখানে কাছিমের ডিম পাওয়া গিয়েছিল, সন্ধ্যার পর আমরা আবার সেইখানে গিয়ে একখানা বড় পাথরের আড়ালে লুকিয়ে রইলুম—কাছিম ধরবার জন্যে !

দক্ষিণ আমেরিকায় যে-ভাবে কচ্ছপ শিকার করা হয়, আমি কেতাবে তা পড়েছি। কচ্ছপদের স্বভাব হচ্ছে, ডাঙায় উঠে বালির ভিতরে ডিম পাড়া। রাত্রে দলে দলে তারা ডাঙায় ওঠে। স্ত্রী-কচ্ছপরা ডিম পেড়ে

বালির ভিতরে লুকিয়ে রাখে! এক-একটা কচ্ছপ একসঙ্গে আশী থেকে একশো-বিশটা পর্যন্ত ডিম পাড়ে। তার পর ভোর হবার আগেই আবার তারা জলে ফিরে যায়।

শিকারীদের কাজ হচ্ছে, কচ্ছপদের ধ'রে উল্টে দেওয়া। তা হলে আর তারা পালাতে পারে না। উল্টে দেবার সময় একটু সাবধান হওয়া দরকার, যাতে কাছিমের ডানা বা মুখের কাছে শিকারীর হাত না পড়ে। কচ্ছপের কামড় বড় সুখের নয়, আর তার ডানার আঘাতও এমন জোরালো যে, এক আঘাতে মানুষের পায়ের হাড় মট্ ক'রে ভেঙে যায়!.....এই সব কথা আমি সকলকে বুঝিয়ে দিতে লাগলুম।

আকাশে তখন একফালি চাঁদ দেখা দিয়েছে, কিন্তু তার আলো এত ক্ষীণ যে, অন্ধকার দূর হচ্ছে না। যে ভয়ানক বন থেকে আমরা পালিয়ে এসেছি, অনেক দূরে একটা জমাট কালো ছায়ার মতন তাকে দেখা যাচ্ছে। তার দিকে যতবার তাকাই, আমাদের বুক অমনি ছুরু-ছুরু ক'রে ওঠে! ও বনে যে কী আছে, ভগবান তা জানেন!

এমন সময়ে সাদা বালির উপরে একটা কালো

মাস্তাকানন

রেখা টেনে, প্রকাণ্ড একটা কচ্ছপ আমাদের খুব কাছে এসে, চারিদিকে একপাক ঘুরে এল।

বিমল তাকে তখনি ধরতে যাচ্ছিল আমি বাধা দিয়ে চুপিচুপি বললুম, “খানো, খানো! ওটা হচ্ছে কাছিমদের কর্তা। ও আগে এসে চারিদিকে গণ্ডী কেটে রেখে যাচ্ছে। কর্তা গিয়ে খবর দিলে পর আর সব কাছিম এসে এই গণ্ডীর ভিতরে আড্ডা গাড়বে। তারপর আমরা আক্রমণ করব।”

রামহরি বললে, “হ্যাঁ হ্যাঁ, ঐ যে কাছিম-ভায়া ফিরে যাচ্ছেই তো বটে!”

আর বেশীক্ষণ অপেক্ষা করতে হ'ল না, কাছিম-কর্তা ফিরে যাবার পরেই দলে দলে ছোট-বড় কচ্ছপ ডাঙার উপরে এসে উঠল।

তার পরেই আমাদের আক্রমণ! আমরা বেগে গিয়ে তাদের এক-একটাকে ধ'রে বালির উপরে চিৎ ক'রে ফেলে দিলুম। কাজটা অবশ্য খুব সহজ নয়, কারণ তাদের অনেকেই ওজনে প্রায় একমণ, কি আরো বেশী।

আমরা প্রায় গোটা-দশেক কাছিম বন্দী করলুম—বাকিগুলো জলে পালিয়ে গেল। আমরা আগেই

কতকগুলো শুকনো লতা সংগ্রহ ক'রে এনেছিলুম—
বন্দীদের পা বাঁধবার জন্তে। সেই লতা দিয়ে আমরা
তখনি তাদের বেঁধে ফেললুম।

বিমল বললে, “যাক্, এখন কিছুদিনের জন্তে
আমাদের পেটের ভাবনা আর রইল না। এইভাবে
এ দেশ থেকে পালাবার কথা ভাবতে হবে!”

বিমলের কথা শেষ হ'তে না হ'তেই ভীষণ এক
বিকট চীৎকারে সমস্ত পৃথিবী যেন পরিপূর্ণ হয়ে গেল।
উঃ, তেমন উচ্চ চীৎকার আমি জীবনে আর কখনো
শুনি-নি,—যেন হাজারটা গিংহ একসঙ্গে এক স্বরে
গর্জন ক'রে উঠল।

সে অমানুষিক চীৎকারে আমাদের সমস্ত শরীর
এলিয়ে পড়ল, কেউ আমাদের আক্রমণ করলেও তখন
আমরা সেখান থেকে এক পা নড়তে পারতুম না।

আবার—আবার—আবার সেই আকাশ-কাটানো
গর্জন,—একবার, দুইবার, তিনবার!

সমুদ্রের জল থেকে কী ওটা উঠে আসছে—কী
ওটা, কী ওটা?

অস্পষ্ট আলোয় তাকে ভালো ক'রে বোঝা যাচ্ছে
না—কিন্তু তার মাথা প্রায় তালগাছের সমান উঁচু,

মাস্তাকানন

আর তার দেহের তুলনায় হাতীর দেহও বিড়ালের
সামনে নেংটি হাঁহুরের মত নগণ্য! সেই ভয়ানক
সমুদ্র-দানবের :চোখছটো আলো-আঁধারির মধ্যে
অগ্নি-শিখার মতন জ্বলে জ্বলে উঠছে!

আমি সভয়ে বললুম, “পালাও, পালাও!”

বিমল কাতর স্বরে বললে, “আমার পা-ছটো যে
অসাড় হয়ে গেছে, পালাবার যে উপায় নেই।”

রামহরি একটা আর্তনাদ ক’রে অজ্ঞান হয়ে প’ড়ে
গেল।

কুমার আর কমল দুই হাতে মুখ চেপে বালির
উপরে ব’সে পড়ল।

আমার দুই চোখ যেন অন্ধ হয়ে গেল!

এখন উপায়?

পাঁচ

ডিলোডোকাস ?

দলের ভিতর থেকে সেই সৃষ্টিছাড়া জীবটা যখন প্রথম মাথা তুললে, তখন তাকে মনে হ'ল যেন একটা বিষম মোটা অজগর সাপের মত। কিন্তু এক মুহূর্ত পরেই আবিষ্কার মতন দেখা গেল তার বিরাট দেহ। তার চারটে পা এবং পা-গুলো তার দেহের তুলনায় খুব ছোট হ'লেও প্রত্যেক পা-খানা অন্ততঃ ছয়-সাত ফুটের চেয়ে কম উঁচু হবে না।

আমরা স্তম্ভিতের মতন দাঁড়িয়ে দাঁড়িয়ে দেখতে লাগলুম, সেই সাগর-দানব ডাঙায় উঠে তার প্রায় পঁচিশ-ত্রিশ ফুট লম্বা ল্যাজ বার-কতক বালির উপরে আছড়ালে, তারপর হঠাৎ নিজের হাতীর চেয়ে দ্বিগুণ লম্বা, চওড়া ও উঁচু দেহের উপরে একটা বিশফুট লম্বা অজগরের মতন গলা শূন্যে তুলে আবার তেমনি বাজের মতন চাঁৎকার করতে লাগল। সে-সময়ে তার মাথাটা

মাহাকানন

এত উর্ধ্বে উঠল যে পাশে কোন তিন-তালা বাড়ী থাকলেও তার ছাদের উপর থেকে সে অনায়াসে শিকার ধরতে পারত।

তার ভীষণ চীৎকারে রামহরির মূর্ছা আপনি ছুটে গেল। সে চীৎকারে মৃতের চির-নিদ্রাও বোধ হয় ভেঙে যায়, রামহরির মূর্ছা তো সামান্য কথা।

তবু আমরা কেউ পালাতে পারলুম না—যেন এক অসম্ভব দুঃস্বপ্ন দেখে আচ্ছন্নের মত দাঁড়িয়ে রইলুম।

তারপরেই আচম্বিতে চীৎকার থামিয়ে সেই ভীষণ জীবটা ঝপাং ক'রে আবার সমুদ্রের জলে ঝাঁপিয়ে পড়ল,—দেখতে দেখতে তার দেহের সমস্তটা আবার অদৃশ্য হয়ে গেল, জলের উপরে জেগে রইল শুধু তার অঙ্গগরের মতন মাথা এবং গলার খানিকটা। ঐ মাথা ও গলার তলায় যে কি প্রকাণ্ড ও অদ্ভুত দেহ আছে, তাকে তখন দেখলে কেউ তা কল্পনা করতে পারত না।

এতক্ষণে আমাদের সাড় হ'ল। আমি বললুম, “জীবটা বোধ করি আমাদের দেখতে পায় নি,—এইবেলা পালাই চল।”

তারপরেই আমরা সবাই একসঙ্গে তীরের মতন

পাহাড়ের দিকে ছুট দিলুম,—একেবারে গুহার সামনে
না গিয়ে দাঁড়াতে ভরসা করলুম না। বিমল রুদ্ধশ্বাসে
বললে, “বিনয়বাবু একি দেখলুম।”

—“আমিও তাই ভাবছি।”

রামহরি দুইহাত কপালে চাপড়ে বললে, “আর
ভেবে কি হবে, এখানে আর আমাদের নিস্তার
নেই।”

কুমার হাঁপাতে হাঁপাতে জিজ্ঞাসা করলে, “বিনয়-
বাবু, মঙ্গল ছাড়া আর কোন গ্রহে কি জীবের বসতি
আছে?”

আমি বললুম, “থাকতেও পারে।”

—“আমরা তাহ’লে অণু কোন গ্রহে এসে
পড়েছি।”

—“কেন তুমি এ অনুমান করচ?”

—“পৃথিবীতে এ রকম ভয়ানক জীবের কথা কেউ
কখনো শুনেচে?”

কমল বললে, “উঃ। ভাবতেও আমার বুক টিপ
টিপ করচে।”

আমি বললুম, “আমরা যে পৃথিবীতে এসেছি,
তাতে আর কোনই সন্দেহ নেই। এ রকম সাগর-

মাস্কাকানন

দানবের কথা আমরা আর কখনো শুনি নি বটে, কিন্তু এই বিপুল পৃথিবীর কোথায় কি আছে, মানুষ তার সব রহস্য তো জানে না। তবে যে-জীবটিকে আমরা এখন দেখলুম, এটি নিশ্চয়ই 'প্রাগৈতিহাসিক' জীব। প্রাগৈতিহাসিক কি জানো তো? যে-যুগের ইতিহাস পাওয়া যায় না, সেই-যুগকে ইংরেজীতে বলে Pre-historic যুগ। এই Pre-historic কথাটিকে বাংলায় বলে 'প্রাগৈতিহাসিক'।”

বিমল বললে, “হ্যাঁ, সে যুগের কথা আমি কেভাবে পড়েছি। পৃথিবীর সেই আদিম যুগে, যখন মানুষের জন্ম হয় নি, তখন জলে, স্থলে, আকাশে নানান অদ্ভুত আকারের জীবজন্তু বিচরণ করত। তখনকার অনেক জলচর আর স্থলচর জীবের আকার ছিল ছোটখাট পাহাড়েরই মত বড়। তাদের প্রকাণ্ড প্রকাণ্ড কঙ্কাল এখনো মাটি খুঁড়লে পাওয়া যায়। কিন্তু বিনয়বাবু, সে-সব জীব তো মানুষ জন্মাবার আগেই পৃথিবী থেকে অদৃশ্য হয়ে গেছে?”

আমি বললুম, “এ কথা জোর ক’রে বলা যায় না। পৃথিবীতে এখনো এমন অনেক স্থান আছে, মানুষ যেখানকার কথা কিছুই জানে না। সে-সব জায়গায়

কি আছে আর কি না আছে, কে তা বলতে পারে ? মাঝে মাঝে ভ্রমণকারীদের বর্ণনায় পড়া যায়, পৃথিবীর স্থানে স্থানে কেউ কেউ সেকেলে জানোয়ারদের মত অসম্ভব আকারের জানোয়ার স্বচক্ষে দর্শন করেছে। সে কথা অনেকেই বিশ্বাস করেন না বটে, কিন্তু কথাটা যে মিথ্যা, এমন প্রমাণও তো নেই ! এই যে আমরা আজ একটা জুঁত জীব দেখলুম, এটাকে তো চোখের ভ্রম ব'লে উড়িয়ে দেওয়া চলবে না ! প্রাগৈতিহাসিক বা সেকেলে জীবদের অনেক কাহিনী আমি পড়েছি। সেকালে “ডিপ্লোডোকাস” ব'লে এক প্রকাণ্ড জানোয়ার ছিল। আজ যে সাগর-দানবকে আমরা দেখেছি, তার সঙ্গে ঐ “ডিপ্লোডোকাসের” চেহারা আশ্চর্য রকম মিলে যায় ! কিন্তু আজ অনেক রাত হয়েছে, এ-সব কথা এখন থাক্। ভেবে-চিন্তে এ-সম্বন্ধে আমার যা ধারণা, পরে তা তোমাদের কাছে জানাব। এখন এস, ঘুমের চেষ্টা দেখা যাক্ গে।”

ছয়.

আবার বিশদ

পরদিন সকাল বেলায় আমরা ভয়ে ভয়ে আবার সমুদ্রের ধারে গেলুম—বন্দী কচ্ছপগুলোকে ধ'রে আনবার জন্তে।

সৌভাগ্যের কথা, সাগর-দানবের আর কোন উদ্দেশ্য পাওয়া গেল না। কেবল যে-স্থানে দাঁড়িয়ে সে লাঙ্গুল আফালন করেছিল, সেখানটায় দেখা গেল, বালির ভিতরে মস্ত একটা গর্ত হয়েছে! সে গর্তের ভিতরে অনায়াসেই দশ-বারোজন লোককে কবর দেওয়া যায়। যার ল্যাজেই এত জোর, তার গায়ের জোব যে কত, আমরা তা কল্পনাও করতে পারলুম না!

বালির উপরে সাগর-দানবের প্রকাণ্ড প্রকাণ্ড পায়ের দাগও আমাদের চোখে পড়ল!

হঠাৎ কমল ব'লে উঠল, “একি! নোট্টে তিনটে কচ্ছপ রয়েছে! অণ্ডগুলো গেল কোথায়?”

মোটে তিনটে কচ্ছপ ! বেশ মনে আছে, আমরা দশটা কচ্ছপ ধ'রে ছিলাম ! তারা যে বাঁধন খুলে সমুদ্রে পালায় নি তাতে আর কোনই সন্দেহ নেই । কারণ তাদের পিঠের শক্ত খোলগুলো ভাঙা-চোরা অবস্থায় সেখানেই ছড়িয়ে প'ড়ে ছিল । কোন জীব এসে যে তাদের মাংস খেয়ে গেছে, এটা বুঝতে আমাদের কিছুমাত্র বিলম্ব হ'ল না ।

আমি ভাবলুম নিশ্চয়ই এ সাগর-দানবের কীর্তি !

কিন্তু বিমল চেষ্টা করে বললে, “বিনয়বাবু, বিনয়বাবু, দেখে যান ।”

বিমলের কাছে গিয়ে দাঁড়াতেই সে নীচের দিকে অঙ্গুলি নির্দেশ করলে । চেয়ে দেখলুম, বালির উপরে বড় বড় পায়ের দাগ ;

বিমল বললে, “দেখছেন, এগুলো সাগর-দানবের পায়ের দাগ নয় ?”

হ্যাঁ, এ পায়ের দাগ একেবারে অন্য রকম ! তবে এও নিশ্চয় আর একটা বিরাটদেহ দানবের পদচিহ্ন, কারণ প্রত্যেকটি পায়ের দাগ লম্বায় অন্ততঃ তিন ফুটের চেয়ে কম নয় ! উঃ, না জানি এ জীবটার আকার কী প্রকাণ্ড ! প্রতি চারটে ক'রে পায়ের দাগের মাঝখানে

মাস্তাকানন

আবার আর একটা ক'রে লম্বা-চওড়া অদ্ভুত দাগ রয়েছে! ভালো ক'রে দেখে বুঝলুম, এটা সেই অজানা দানবেরই বিপুল লাঙ্গুলের চিহ্ন!

বিমল সেই পায়ে দাগ অনুসরণ ক'রে অগ্রসর হ'ল। রামহরি, কুমার আর কমলকে সেইখানেই অপেক্ষা করতে ব'লে আমিও বিমলের পিছনে পিছনে চললুম।

যেতে যেতে বিমল বললে, “বিনয়বাবু, যার পায়ে দাগ আমরা দেখছি সেইই নিশ্চয় কচ্ছপগুজোকে খেয়ে ফেলেচে।”

—“আমারও তাই বিশ্বাস।”

—“কিন্তু অত বড় বড় সাত-সাতটা কচ্ছপ একসঙ্গে খাওয়া তো যে সে জীবের কৰ্ম নয়!”

—“তা তো নয়ই! কিন্তু তুমি কোথায় যাচ্ছ বিমল?”

—“জীবটা কোথায় থাকে, তাই দেখতে। কোন্-দিক থেকে বিপদ আসবার সম্ভাবনা, সেটা জেনে রাখা ভালো।”

আমি আর কিছু না ব'লে বিমলের সঙ্গে সঙ্গে যেতে লাগলুম।

আমরা প্রায় এক মাইল পথ পার হয়ে এলুম।
পায়ের দাগের রেখা তখনো ঠিক সমানই চলেছে !
খানিক তফাতেই একটা ছোটখাটো বন রয়েছে, পায়ের
দাগ গেছে সেই দিকেই ।

আমি বললুম, “বিমল জন্মটা যে ঐ বনের ভেতরেই
থাকে তা বেশ বোঝা যাচ্ছে, আমাদের আর অগ্রসর
হবার দরকার নেই ।”

বিমল কি-একটা জবাব দিতে গিয়ে হঠাৎ থেমে
পড়ল, তারপর বিষয়-বিষ্ফুরিত নেত্রে একদিকে
তাকিয়ে রইল ।

যেদিকে সে চেয়ে আছে সেইদিকে তাকিয়ে
আমিও যেন থ হয়ে গেলুম !

একটু দূরেই হাড়গোড়-ভাঙা ‘দ’য়ের মতন একটা
গাছ একলা দাঁড়িয়ে রয়েছে এবং তারই তলায় ব’সে
বিচিত্র এক জানোয়ার আমাদের দিকে তাকিয়ে আছে ।

চোখের সামনে দেখলুম যেন ভীষণতার জীবন্ত
প্রতিমূর্তি ! এ জীব যেন ভগবানের সৃষ্টির বাইরেকার !
তার মুখখানা অনেকটা কুমীরের মত, সামনের পাছুটো
ছোট, পিছনের পাছুটো বড়, আর তার মোটামোটা
সাজটা দেখতে কাঙ্গারির মতন ।

স্বাস্থ্যকানন

তার দেহ অস্তুতঃ ত্রিশ হাতের চেয়ে কম হবে না !
হঠাৎ সে ল্যাজ আর পিছনের পায়ে ভর দিয়ে
দাঁড়িয়ে উঠল, তারপর বিকট এক অপার্থিব চীৎকার
ক'রে ঠিক কাঙ্গারুর মতন এক লাফ মারলে ! অত-
বড় দেহ নিয়ে কোন জীব যে অমন ক'রে লাফ মারতে
পারে, না দেখলে আমি তা বিশ্বাস করতে পারতুম
না !

বিমল সভয়ে ব'লে উঠল, “ওয়ে আমাদের দিকেই
আসচে ! পালান—পালান !”

আমরা ছুজনে প্রাণপণে ছুটলুম—আর সেই কুমীর
কাঙ্গারুও ঠিক তেমনি ক'রেই শূণ্ণে লাফ মারতে-
মারতে আমাদের অনুসরণ করলে ! মাঝে মাঝে তার
ভীষণ চীৎকার শুনে আমার গায়ের রক্ত যেন জল হয়ে
যেতে লাগল !

মাত

বিমলের বীরত্ব

আমরা ছুজনে ছুটছি, ছুটছি, আর ছুটছি !

আমাদের পিছনে লাফাতে লাফাতে আসছে সাক্ষাৎ
মৃত্যুর মত সেই ভয়ানক জানোয়ারটা !

প্রতি লক্ষ্যেই সে আমাদের বেশী কাছে এসে
পড়ছে !

ছুটতে ছুটতে চেয়ে দেখলুম, তার সেই কুমীরের
মত প্রকাণ্ড মুখখানা একদার খুলছে আর একবার বন্ধ
হচ্ছে এবং তার ভিতর থেকে দেখা যাচ্ছে, লাল
টকটকে হৃৎকোষ একখানা জিভ ও দুইসার ভীষণ দাঁত !
অত বড় দেহের পক্ষে তার চোখদুটো খুব ছোট বটে,
কিন্তু কি ক্রুর, কি নিষ্ঠুর সেই চোখের দৃষ্টি !

—হঠাৎ কিসে হেঁচট খেয়ে আমি ঘুরে প'ড়ে
গেলুম ! দারুণ যন্ত্রণায় আর্তনাদ ক'রে তখনি আমি
দাঁড়িয়ে উঠলুম বটে,—কিন্তু ছুটতে গিয়ে আর ছুটতে
পারলুম না ।

মায়াকানন

বিমলও দাঁড়িয়ে প'ড়ে বললে, “একি বিনয়বাবু, হ'ল কি ?”

যাতনায় মুখ বিকৃত ক'রে আমি বললুম, “আমি আর ছুটতে পারছি না বিমল ! আমার ডান পা মুচুড়ে একেবারে এলিয়ে পড়েছে !”

বিমল সভয়ে বললে, “তা হলে উপায় ?”

আমি আবার পিছনে চেয়ে দেখলুম ! সেই দানবটা তখন আমাদের কাছে এসে পড়েছে, আর কয়েকটা লাফ মারলেই সে একেবারে আমাদের ঘাড়ের উপরে এসে পড়বে !

আমি প্রাণের আশায় জলাঞ্জলি দিয়ে বললুম, “বিমল, শীগ্গির পালাও !”

বিমল বললে, “আপনাকে এখানে ফেলে ? এমন কাপুরুষ আমি নই !”

—“বিমল, বিমল, আমার জন্তে তুমি মরবে কেন ? এখনো সময় আছে, এখনো পালাও !”

বিমল দৃঢ়স্বরে বললে, “মরতে হয়তো ছুজনেই এক সঙ্গে মরব, কিন্তু আপনাকে ফেলে কিছুতেই আমি পালাতে পারব না”—এই ব'লেই সে বন্দুক তুলে ফিরে দাঁড়াল ।

তার অদ্ভুত সাহস ও বীর্যে মুগ্ধ হয়ে আমি বললুম,
“কিন্তু বিমল, তোমার ঐ সামান্য বন্দুকের গুলিতে এত-
বড় ভীষণ জন্তুর কোন ক্ষতি হবে না,—এখনো পাল্লাও,
নইলে আমরা ছুঁজনেই একসঙ্গে মরব !”

—“দেখা যাক্” বলে সে বন্দুকের লক্ষ্য স্থির
করতে লাগল ।

সেই ভয়াবহ কুমীর-কাঙ্গারু তার পিছনের ছুই
পা ও ল্যাঞ্জে ভর দিয়ে লাফের পর লাফ মারতে মারতে
তখনো এগিয়ে আসছে ! সেই অতি বিপুল দেহের
উপরে একটা পাহাড় ভেঙে পড়লেও তার কোন
আঘাত লাগে কি না সন্দেহ, বিমলের এতটুকু বন্দুকের
গুলিতে তার আর কি অনিষ্ট হবে ?

এ যাত্রা আর বোধ হয় রক্ষা নেই—আমি তো
মরবই, আমার জন্তে বিমলকেও প্রাণ দিতে হবে !

ভাবছি, এমন সময়ে বিমলের বন্দুক গর্জন ও অগ্নি
উদগার করলে !

—সঙ্গে সঙ্গে দানবটাও থমকে দাঁড়িয়ে পড়ল !

বিমল আবার বন্দুক ছুঁড়লে ।

দানবটা আকাশের দিকে মুখ তুলে বজ্রনাদের মতন
ছুইবার গর্জন করলে, তারপর লাফাতে লাফাতে

মায়াকানন

আবার যে পথে এসেছিল সেইদিকেই বেগে পলায়ন করতে লাগল !

বিমল মহা উল্লাসে ব'লে উঠল, “বিনয়বাবু, আর আমাদের ভয় নেই !”

আমি হাত বাড়িয়ে তাকে বুকের ভিতরে টেনে নিয়ে বললুম, “বিমল, তোমার সাহসেই আমার প্রাণ রক্ষা হ'ল !”

বিমল বললে, “কিন্তু ছোটো গুলি খেয়ে ঐ জানোয়ারটা যদি ভয় পেয়ে না পালাত, তাহ'লে আমরা কেউই বাঁচতুম না ! আপনি ঠিক কথাই বলেছেন, বন্দুকের গুলিতে ওর বিশেষ কিছুই ক্ষতি হবে না !”

আমি বললুম, “কিন্তু ওকে দেখে বুঝতে পারচ কি, ও একালের জীব নয় ? প্রাগৈতিহাসিক কালের যে যুগকে পণ্ডিতরা সরীসৃপ-যুগ বলেন, ওর আকার সেই যুগের জীবের সঙ্গে অবিদল মিলে যাচ্ছে ! বিমল, আমার দৃঢ় বিশ্বাস, আমরা পৃথিবীর এমন কোন স্থানে এসে পড়েছি, যেখানে কোন অজানা কারণে পৃথিবীর সেকালের জীবরা এখনো বর্তমান আছে। এ এক অভাবিত আবিষ্কার ! এ সংবাদ জানতে পারলে সারা পৃথিবীতে মহা আন্দোলন জেগে উঠবে !”

বিমল বললে, “কিন্তু এটা আবিষ্কারের বার্তা নিয়ে আমরা কি আবার সভ্যজগতে ফিরে যেতে পারব ?”

আমি বললুম, “আজ যে জীবটার বিরুদ্ধে তুমি একাই দাঁড়াতে ভরসা করলে, ও-জীবটা যদি হঠাৎ পৃথিবীর কোন সহরে গিয়ে হাজির হয়, তবে ওর ভয়ঙ্কর মূর্তি দেখে সহরশুদ্ধ লোক নিশ্চয়ই সহর ছেড়ে পলায়ন করবে! তোমার মতন বীর যখন আমাদের মধ্যে আছে, তখন আমরা এদেশ থেকে বিজয়ীর মতন ফিরতে পারব না কেন বিমল?”

বিমল সলজ্জ কণ্ঠে বললে, “বিনয়বাবু, আপনি বার বার ঐ কথা তুলে আমাকে লজ্জা দেবেন না। দেখি, আপনার পায়ের কোন খানটা মুচকে গেছে?”

আট

পল্লভ-পাখী

সেদিন গুহায় ফিরে এসে দেখলুম, কুমার, কমল আর রামহরি রান্নার আয়োজনে ব্যস্ত হ'য়ে আছে !

রামহরি ভিজে মাটির তাল দিয়ে কতকগুলো ছোট-বড় পাত্র তৈরি ক'রে সেগুলোকে পুড়িয়ে শুক ক'রে নিয়েছিল। উনুন তৈরি করতেও সে ভোলে নি। সমুদ্রের জল যখন আছে, তখন লবণেরও অভাব হয়-নি। কাজেই অন্য কোন মশলা না থাকলেও এত বিপদের পরে কচ্ছপের সিদ্ধ মাংস আর ডিম আজ বোধ হয় নিতান্ত মন্দ লাগবে না !... ..

সত্যিই মন্দ লাগল না ! বেশী আর কি বলব, রামহরির রান্না আজ এত ভালো লাগল যে আমার মনে হ'ল, সহরে নিশ্চিন্তভাবে ব'সেও এর চেয়ে ভালো সুস্বাদু খাবার আর কখনো খাই-নি !

দিন-তিনেক আমরা কেউ আর পাহাড় থেকে নীচে

নামলুম না, বেশীর ভাগ সময়ই গুহার ভিতরে ব'সে ব'সে গল্পগুজবে আর পরামর্শেই কাটিয়ে দিলুম ।

আজ বৈকালে আমরা ঠিক করলুম, পাহাড়ের সব-উঁচু শিখরে উঠে দেখে আসব, যে দেশে আমরা এসে পড়েছি তার চারিদিকের দৃশ্য কি-রকম দেখতে ।

যথাসময়ে উপত্যকার ভিতর দিয়ে আমরা পাহাড়ের উপরে উঠতে শুরু করলুম । তখনো আমার পায়ের ব্যথা সারে নি, কাজেই আমার বেশ কষ্ট হ'তে লাগল । কিন্তু সে কষ্ট আমি মুখে প্রকাশ করলুম না ।

প্রায় দেড় ঘণ্টা পরে, উপত্যকার গর্ভ ছেড়ে আমরা পাহাড়ের একটা উঁচু শিখরের উপরে গিয়ে দাঁড়ালুম ।

চারিদিকে চেয়ে দেখলুম, সমস্ত দেশটা আমাদের পায়ের তলায় ঠিক যেন 'রিলিফ' ম্যাপের মতন প'ড়ে রয়েছে !

সর্বপ্রথমেই একটি সত্য আমাদের চোখের সামনে জেগে উঠল,—আমরা যেখানে এসে পড়েছি, সেটি একটি দ্বীপ ! কারণ পূর্ব, পশ্চিম, উত্তর ও দক্ষিণ,—আমাদের সবদিকেই আকাশের সীমা-রেখা পর্যন্ত অনন্ত সাগরের নীল জল খেলা করছে !

দ্বীপের প্রায়-পূর্ব-দিকে সেই বিশাল ও নিবিড়

স্বাক্ষর

বন—যেখানে এসে আমরা প্রথমে অবতীর্ণ হইয়াছিলাম।
আমরা বেশ বুঝলাম, ছীপের সমস্ত বিভীষিকা ঐ নিবিড়
অরণ্যের ভিতরেই লুকানো আছে, কিন্তু এখান থেকে
তার সুন্দর শ্যামলতা ছাড়া আর কিছুই আমাদের
নজরে পড়ল না।

অরণ্যের এক পাশে মস্ত-একটা হ্রদ। তার তীরে
তীরে নানাজাতীয় পাখী বিচরণ করছে। দূর থেকে
সেগুলো কি পাখী, তা কিন্তু বোঝা গেল না।

বিমল উৎসাহ-ভরে বললে, “কালকেই আমি
বন্দুক নিয়ে ওখানে গিয়ে ছ-একটা পাখী শিকার ক’রে
আনব!”

কুমার হেঁট হ’য়ে নীচের দিকে তাকিয়ে সবিস্ময়ে
বললে, “দেখ দেখ, এখানে আবার কি বিট্কেল জীব
ব’সে আছে!”

পাহাড়ের ধারে গিয়ে দেখি, আমাদের ঠিক নীচেই
চারটে অদ্ভুত আকারের জীব পাথরের মূর্তির মত
নিথর হয়ে চুপ ক’রে পাশাপাশি ব’সে আছে! তাদের
গায়ের রং ধূসর, চোখগুলো ভাঁটার মত গোল গোল,
রক্তবর্ণ! তাদের আকার প্রায় পাঁচ ছয় ফুট লম্বা
এবং তাদের দেহের ছ-পাশে ছ-খানা ডানা ও তলার

দিকে একটা দড়ীর মতন ল্যাজ ঝুলছে ! মুখ দেখলে তাদের পাখী ব'লে মনে হয় বটে, কিন্তু কারুর গায়েই পালকের চিহ্নমাত্র নেই ! তাদের দেখতে এমন বীভৎস যে, আমার বুকের কাছটা থর্ থর্ ক'রে কেঁপে উঠল ।

হঠাৎ তারাও আমাদের দেখতে পেল ! বিক্রী এক চীৎকার ক'রে তারা তখনি ডানা ছড়িয়ে উড়তে শুরু করলে । তাদের দুই ডানার বিস্তার অন্ততঃ পনের হাতের কম হবে না—আমার মনে হ'তে লাগল, যেন এক একটা চতুষ্পদ প্রকাণ্ড জন্তু চার পায়ে ডানা বেঁধে শূন্যে উড়ছে ! তাদের দীর্ঘ চঞ্চুর ভিতর থেকে ধারালো ও বড় বড় দাঁতের সারিও আমরা স্পষ্ট দেখতে পেলুম !

রামহরি ব'লে উঠল, “এ কি গরুড়-পাখী ?”

রামহরির নাম দেবার শক্তি আছে বটে ! এই কিত্তিতকিমাকার উড়ন্ত জীবগুলোকে সত্যসত্যই অনেকটা গরুড়ের মতই দেখাচ্ছিল !

প্রথমটা তারা আমাদের মাথার উপর চক্র দিয়ে একবার ঘুরে গেল,—তারপর হঠাৎ তাদের একটা তীরের মতন নীচের দিকে ঝাঁপ দিলে !

আমরা সাবধান হবার আগেই সে হুম ক'রে

মাহাকানন

বিমলের ঘাড়ের উপরে এসে পড়ল এবং সঙ্গে সঙ্গে তার প্রকাণ্ড ডানা ও দেহের ধাক্কায় বিমল পাহাড়ের একদিকে ঠিকরে চিৎ হয়ে পড়ে গেল !

কাছেই কুমার ছিল, সে তার বন্দুকের কঁদো দিয়ে সেই জীবটার গায়ের উপরে এক ঘা বসিয়ে দিলে ! জন্তুটা কর্কশ চীৎকারে চারিদিক কাঁপিয়ে সেই মুহূর্তে ফিরে তাকে আক্রমণ করলে,—কুমার আবার তাকে মারবার জন্যে বন্দুক তুললে, সে কিন্তু তার আগেই কুমারের একখানা হাত কামড়ে ধরলে এবং চোখের পলক না ফেলতে কুমারকে মাটি থেকে টেনে তুলে শূণ্যের দিকে উঠল !

এত-শীঘ্র ব্যাপারটা ঘটল যে, আমরা সাহায্য করবার জন্যে একখানা হাত পর্য্যন্ত তোলবার সময় পেলুম না !

কুমার আর্তনাদ ক'রে উঠল, “বাঁচাও, আমাকে বাঁচাও !”

নয়

উড়ন্ত সরীসৃপ

ঠিক আমার সুমুখ দিয়েই কুমারের দেহটা শূন্যে উঠে যেতে লাগল।

কুমার আবার আর্তস্বরে চীৎকার করলে, “বাঁচাও, বাঁচাও!”

আমার বিষ্ময়ে চমকটা ভেঙে গেল! তখনো কুমারের দেহ নাগালের বাইরে গিয়ে পড়ে-নি,— সামনের দিকে একলাফে এগিয়ে হাত বাড়াতেই আমি কুমারেরপা ছটো মৃঠোর ভিতরে পেলুম এবং প্রাণপণে তাই ধরে টানতে লাগলুম।

কিন্তু এই গরুড়-পাখীর গায়ে কি ভয়ানক জোর! সে কুমারের সঙ্গে আমাকেও প্রায় উপরে টেনে তোলবার উপক্রম করলে, ভাগ্যে আমি বাম হাতে পাহাড়ের একটা গাছের ডাল চেপে ধরে আর ডান হাতে কুমারেরপা ধরে দেহের সমস্ত শক্তি এক করে

মাহাকানন

টানতে লাগলুম, নইলে আমাকেও কম মুস্থিলে পড়তে হ'ত না।

এদিকে আবার বিপদের উপর নূতন বিপদ ! আমি যখন কুমারকে আর নিজেকে নিয়ে এমনি বিব্রত হ'য়ে আছি, তখন আর-একটা গরুড়-পাখী হঠাৎ তীরের মতন আমার উপরে ছোঁ মেরে পড়ল ! সে তার প্রকাণ্ড ডানা দিয়ে আমাকে এমন প্রচণ্ড এক ঝাপটা মারলে যে, কুমারের পা তো আমার হাত থেকে ফস্কে গেল বটেই, তার উপরে আমি নিজেও ছুই চোখে সর্ষেফুল দেখে তিন চার হাত দূরে ছট্কে গিয়ে পড়লুম !

—সেই সঙ্গেই গুড়ুম ক'রে বন্দুকের আওয়াজ হ'ল !

তাড়াতাড়ি উঠে ব'সে দেখি খানিক তফাতেই একটা গরুড়পাখী ছুই ডানা ছড়িয়ে পাহাড়ের উপরে নিশ্চেষ্ট হয়ে প'ড়ে আছে এবং তার পাশেই রয়েছে কুমারের দেহ । সে দেহ মড়ার মতন স্থির ।

বিমল আর রামহরি তাড়াতাড়ি কুমারের কাছে ছুটে গেল । বিমল তাকে পরীক্ষা ক'রে বললে, “না, কোন ভয় নেই । কেবল অজ্ঞান হয়ে গেছে ।”

মাথার উপরে তাকিয়ে দেখলুম, বাকি তিনটে গরুড়-পাখী তখনো শূণ্যে চক্র দিয়ে আমাদের কাছে কাছেই ঘুরছে-ফিরছে।

কুমারের বন্দুকটা আমার সামনেই প'ড়ে ছিল, আমি তখনি সেটা তুলে নিয়ে লক্ষ্য স্থির ক'রে ঘোড়া টিপলুম! লক্ষ্য ব্যর্থ হ'ল না। আর একটা পাখী ঘুরতে ঘুরতে নাচে প'ড়ে পাহাড়ের ভিতর কোথায় অদৃশ্য হয়ে গেল! বাকি পাখীহুটো ভয় পেয়ে বিশ্রী চাৎকার করতে করতে ক্রমেই উপরে উঠে যেতে লাগল।

খানিক পরেই কুমারের জ্ঞান হ'ল। গরুড়-পাখীর কামড়ে তার বাম হাতখানা ক্ষতবিক্ষত হয়ে গিয়েছিল, এছাড়া তার আর বিশেষ-কিছু অনিষ্ট হয়-নি।

বিমল মরা গরুড়-পাখীটার দিকে অনেকক্ষণ ধ'রে অপলক-চোখে তাকিয়ে থেকে বললে, “কি আশ্চর্য্য জীব!”

আশ্চর্য্য জীবই বটে! অতি-বড় হুঃস্বপ্নেও এমন কিছুতকিমাকার চেহারা দেখা যায় না!

কুমার বললে, “এটা কি জীব বিনয়নাবু? এর

মাস্তাকানন

ডানা আছে বটে, কিন্তু দেহের আর কোন জায়গাই পাখীর মতন নয়! এর চঞ্চুতে কত বড় বড় দাঁত দেখুন! দেহটা প্রায় গিরগিটির মতন, আর গায়ের কোথাও পালোকের চিহ্নমাত্র নেই।”

বিমল বললে, “আকারেও এ জীবগুলো প্রায় মানুষের মতই বড় আর ডানা দুখানাও প্রায় পনেরো হাত লম্বা! সিন্দবাদের গল্পে রুকপাখীর কথা পড়েছি। সেও মানুষকে ছেঁা মেরে নিয়ে যেতে পারত। এটা রুকপাখী নয় তো?”

আমি বললুম, “না। আসলে এটা পাখীই নয়। এদের উপরে দুখানা হাত আর নীচে দুখানা পা আছে। প্রত্যেক হাতে চারটি ক’রে আঙুল। চতুর্থ আঙুলটা লম্বা হয়ে গেছে, আর তাতেই জালের মতন ডানাখানা ঝুলছে। পাখীর ডানার গড়ন এ-রকম হয় না।”

কুমার বলল, “পাখী নয় তো এটা কি?”

আমি বললুম, “উড়ন্ত সরীসৃপ। এও একরকম সেকলে জীব। পণ্ডিতরা এর নাম দিয়েছেন Pterodactyl। কিন্তু আমরা একে গরুড়-পাখী ব’লেই ডাকব।”

সেই দিন সন্ধ্যাবেলাতেই কুমারের কল্প দিয়ে

জ্বর এল। গরুড়পাখীর দাঁতে নিশ্চয়ই কোনরকম বিষ আছে! তার হাতখানাও বিষম ফুলে উঠল। একে এই অজানা দেশ, তায় সঙ্গে কোন ঔষধ নেই, কাজেই কুমারের জন্মে প্রথমটা আমাদের মনে বড় ভাবনা হ'ল।

যা হোক, প্রায় দিন-পনেরো ভুগে কুমার সে-যাত্রা প্রাণে প্রাণে বেঁচে গেল, আমরাও আশ্বস্তির নিঃশ্বাস ফেলে বাঁচলুম।

দশ

ডাইনসরের পাল

গুহার বাইরে একখানা পাথরের উপরে আমি আর
বিমল চুপ করে বসেছিলুম।

সন্ধ্যা হয়-হয়। পশ্চিমের মেঘে মেঘে থরে থরে
আবির সাজিয়ে সূর্য্যদেব আজকের মতন ছুটি নিয়েছেন
এবং সেই রঙিন মেঘগুলির ছায়া সমুদ্রের নীলপটের
উপরে দেখাচ্ছিল যেন ঠিক জলছবির মতন।

চারিদিকের স্তব্ধতার ভিতরে আমার মন আজ
কেমন-কেমন করতে লাগল! কোথায় আমাদের
শ্রাম্ভা বাংলা দেশ, আর কোথায় আমরা প'ড়ে আছি!
এমন শান্ত সন্ধ্যার সময়ে বাংলাদেশের পল্লীতে পল্লীতে
কত শব্দের সাড়া জেগে উঠেছে, বধূরা তুলসীতলায়
প্রদীপ দিয়ে ভক্তিভরে প্রণাম করছে, ছেলের দল
ঠাকুরঘরে ভিড় করে আরতির সময়ে কাঁসর বাজাবার
জন্তে পরস্পরের সঙ্গে কাড়াকড়ি লাগিয়ে দিয়েছে!

এমন সময়ে বিমল হঠাৎ জিজ্ঞাসা করলে,
“বিনয়বাবু, একটা কথা ভেবে দেখেচেন কি ?”

আমার চিন্তাশ্রোতে বাধা পড়ল। মুখ ফিরিয়ে
জিজ্ঞাসা করলুম, “কি বিমল ?”

—“কাছিমের ডিম আর মাংস ছুইই ফুরিয়ে গেছে।
এবার কি খেয়ে আমরা বাঁচব ?”

—“আবার কাছিম ধরতে হবে।”

বিমল খানিকক্ষণ পূর্বদিকে তাকিয়ে রইল।
সেখানকার নিবিড় অরণ্য তখনো অস্পষ্ট ভাবে দেখা
যাচ্ছিল।

বিমল আঙুল দিয়ে সেই দিকটা দেখিয়ে বললে,
“তার চেয়ে ঐ দিকে চলুন।”

—“কেন ?”

—“ওখানে কোন নতুন শিকার মেলে কিনা দেখা
যাক্। রোজ রোজ কাছিমের মাংস আর ভালো লাগে
না। সেদিন পাহাড়ে উঠে দেখেছিলেন তো, ঐ বনের
পাশে মস্ত-একটা হ্রদ আছে ? ঐ হ্রদের আশেপাশে
নিশ্চয়ই নতুন কোন শিকারের সন্ধান পাওয়া যাবে।”

—“সঙ্গে সঙ্গে নতুন কোন বিপদেরও সন্ধান
মিলতে পারে।”

মাল্যকানন

—“বিনয়বাবু, বিপদ এ ছাঁপের কোথায় নেই? কাছিম ধরতে গেলেও তো আবার সাগর-দানবের সঙ্গে দেখা হওয়ার সম্ভাবনা আছে! বিশেষ, এ ছাঁপের কোথায় কি আছে না আছে, সেটা আমাদের জেনে নেওয়া দরকার। নইলে এখানে আমাদের বেঁচে থাকা সহজ হবে না!”

বিমলের কথা যুক্তিসঙ্গত বটে! কাজেই আমি সায় দিয়ে বললুম, “আচ্ছা বিমল, তোমার প্রস্তাবে আমি রাজি!”

পরদিন সূর্য্য ঔঠবার আগেই আমি, বিমল আর রামহরি গুহার ভিতর থেকে বেরিয়ে পড়লুম। কুমার তখনো ভালো ক’রে সেরে ওঠেনি বলে তাকে কমলের তত্ত্বাবধানে গুহাতেই রেখে গেলুম। বাঘা আমাদের সঙ্গে সঙ্গেই চলল। কুমারের বন্দুকটা নিলুম আমি।

সমুদ্রের জলে স্নান ক’রে ভোরের ঠাণ্ডা হাওয়া সেই নিস্তরক মাঠের ভিতর দিয়ে বয়ে যাচ্ছিল, সে হাওয়া আমার বড়ই মিষ্টি লাগল। খানিক পরেই সুদূরের সবুজ বনের মাথায় স্বর্গীয় মুকুটের মতন সূর্য্যের মুখ জেগে উঠল।

রামহরি বললে, “খোকাবাবু, তুমি কি আবার ঐ ময়নামতীর মায়াকাননে যেতে চাও?”

বিমল হেসে বললে, “যদি যাই, তাহলে কি হবে রামহরি?”

রামহরি মাথা নাড়তে নাড়তে বললে, “এবারে ওখানে গেলে তুমি আর প্রাণে বাঁচবে না।”

—“কেন রামহরি, তুমি থাকতে আমাকে প্রাণে মারে কে?”

—“আমি বেঁচে থাকলে তবে তো তোমাকে বাঁচাব? ও বনে ঢুকলে আমরা কেউ আর জ্যান্ত ফিরব না।”

—“ভয় নেই রামহরি, আজ আমরা বনের ভেতরে আর ঢুকব না। বনের পাশে একটা হ্রদ আছে, আমরা সেইখানেই যাচ্ছি।”

এমনি নানান কথা কইতে কইতে খানিক দূর এগিয়ে যেতেই দেখলুম, হ্রদের জল সূর্যের ঝরনে ইম্পাতের মতন চক্চক্ করে উঠছে!

আরো কিছু দূর অগ্রসর হয়েই বুঝলুম, সেই হ্রদের আকার কি বিপুল! তার এপার থেকে ওপারের বিস্তার অন্ততঃ কয়েক মাইলের কম হবে না! তার

মায়াকানন

জলের ভিতরে মাঝে মাঝে কতকগুলো ছোট-বড় পাহাড় মাথা তুলে দাঁড়িয়ে আছে এবং সেই পাহাড়-গুলোর উপরে সাদা সাদা পাখীর মতন কি যেন ঘুরে-ফিরে বেড়াচ্ছে আর জলে ঝাঁপ দিয়ে পড়ছে !

তারপর আমরা যখন একেবারে হৃদের ধারে গিয়ে পড়লুম তখন দেখা গেল, সেগুলো হাঁস ছাড়া আর কিছুই নয় ।

বিমল আশ্চর্য হয়ে বললে, “কিন্তু এ কি-রকম হাঁস ? এদের একটারও যে ডানা নেই !”

আমি বললুম, “বিমল, এ দ্বীপের কোন জীব দেখেই তুমি আর আশ্চর্য হয়ো না । কারণ তোমাকে আগেই বলেছি যে, এ হচ্ছে সেকলে জীবের রাজ্য !”

—“সেকলে হাঁসের কি ডানা ছিল না ?”

—“না । দরকার হয়-নি ব’লে সেকলে হাঁসের ডানা গজায় নি । প্রকৃতির স্বাভাবিক নিয়মই হচ্ছে এই, দরকার না থাকলে কোন কিছুই সৃষ্টি হয় না । বিশেষ, প্রকৃতির পরীক্ষা-কার্য তখনো ভালো ক’রে জমে ওঠেনি, কোন্ জীবের কি আবশ্যক আর কি অনাবশ্যক প্রকৃতি তখনো তা নিশ্চিতরূপে বুঝতে পারে নি, তাই সেকলে জীব-জন্তুদের

দেহে অনেক বাহুল্য, আবার অনেক অভাব
আর অপূর্ণতাও থেকে গিয়েছিল। এই, মানুষের
কথাই ধর না কেন! সেকলে মানুষদের মস্তিষ্ক,
চোখ, মুখ, নাক, দাঁত, ঘাড়, বুক, হাত, পা—কিছুই
একলে মানুষদের মতন ছিল না,—সেকালে—”

হঠাৎ আমার কথায় বাধা দিয়ে বাঘার গর্জনের
সঙ্গে রামহরি চৈতন্যে উঠল—“ও কি ও!”

ফিরে দেখি, খানিক তফাতে মহিষের চেয়েও উঁচু
একটা জীব দাঁড়িয়ে দাঁড়িয়ে আমাদের লক্ষ্য করছে!

আমি ব'লে উঠলুম—“এন্টেলোডন্ট্, এন্টেলোডন্ট্!”

বিমল বললে, “এন্টেলোডন্ট্! সে আবার কি?”

—“সেকলে দানব-শূকর!”

বিমল তখনি বন্দুক ছুঁড়লে এবং পর-মুহূর্ত্তেই
শূকরটা মাটির উপরে লুটিয়ে পড়ল।

আমরা সবাই তার দিকে দৌড়ে গেলুম। কিন্তু
শূকরটা মরেনি, আহত হয়েছিল মাত্র। কারণ আমরা
তার কাছে যাবার আগেই সে আবার দাঁড়িয়ে উঠে
তাড়াতাড়ি সামনের জঙ্গলের দিকে ছুটল।

সব-আগে বাঘা, তারপর বিমল, তারপর আমি
আর রামহরি—এই ভাবে আমরা শূকরটার পিছনে

মারাকানন

ছুটে লাগলুম। কিন্তু অল্পক্ষণ পরেই শূকরটা বনের ভিতরে অদৃশ্য হয়ে গেল।

রামহরি চৈঁচিয়ে বললে, “বনের ভিতরে ঢুকোনা খোকাবাবু, বনের ভেতরে ঢুকোনা!”

কিন্তু বিমলের মাথায় তখন শিকারীর গৌঁ চেপেছে—হুঁস্থিদিব্য জ্ঞান হারিয়ে সেই নিবিড় অরণ্যের মধ্যে সে প্রবেশ করল! কাজেই তার পিছনে যাওয়া ছাড়া আমাদেরও আর উপায়ান্তর রইল না।

বন যখন ক্রমে অত্যন্ত ঘন হয়ে উঠল, তখন আমিও বলতে বাধ্য হলাম, “বিমল আর নয়, এইবারে আমাদের ফেরা উচিত!”

বিমল বললে, “এই যে, শূকরের রক্তের দাগ এখনো দেখা যাচ্ছে!”

এমনি ক’রে ঘণ্টা-দুয়েক ছুটাছুটির পর রক্তের দাগও আর পাওয়া গেল না! বিমল হতাশ ভাবে একটা গাছের তলায় বসে পড়ল। আমরাও বিষম হাঁপিয়ে পড়েছিলাম, সেইখানেই এক-একটা গাছের গুড়িতে ঠেস দিয়ে বিশ্রাম করতে লাগলাম।

প্রায় আধ ঘণ্টা বিশ্রামের পর আমি দাঁড়িয়ে উঠে বললাম, “চল, এইবারে ফেরা যাক!”

বিমল একটা দীর্ঘশ্বাস ফেলে বললে, “কাজেই।”

খানিকদূর অগ্রসর হয়ে বুঝলুম, আমরা ভুল পথ ধরে চলেছি। সেদিক থেকে ফিরে এসে আবার অল্প পথ ধরলুম, কিন্তু তবু বন থেকে বেরুবার পথ খুঁজে পেলুম না।

তখন বেলা ছপুব হবে। আমরা যেখানে দাঁড়িয়ে আছি সেখানে উপরে, নীচে, চার পাশে এমন বিষম জঙ্গল আর গাছপালা যে, ছপুরের সূর্যালোকও সে বনের ভিতরে যেন ঢুকতে সাহস করেনি!

আমি দমে গিয়ে বললুম, “বিমল, আমরা পথ হারিয়েছি!”

বিমল বললে, “পথ আমাদের খুঁজে বার করতেই হবে। এইদিকে আসুন।”

বিমলের পিছনে পিছনে আবার চললুম। কিন্তু মিনিট-কয়েক পরেই হঠাৎ চমকে বিমল থমকে দাঁড়িয়ে পড়ল!

আমি সুধোলুম, “কি হ’ল বিমল, হঠাৎ দাঁড়ালে কেন?”

কোন জবাব না দিয়ে, বিমল সুধু হাত তুলে ইসারায় বললে, “চুপ!”

মায়াকানন

আমি পা টিপে এগিয়ে গিয়ে যা দেখলুম, তাতে আমার পাছটো যেন অসাড় হয়ে মাটির ভিতরে ব'সে গেল ! তেমন অভাবিত দৃশ্য জীবনে আর কখনো আমি দেখিনি !

পথের পাশেই জঙ্গলের ভিতর থেকে খানিকটা খোলা জমি দেখা যাচ্ছে, সেই জমির ভিতরে দলে দলে ভৌষণ-দর্শন জীব বিচরণ করছে—তাদের অধিকাংশই মাথায় প্রায় ষাট-সত্তর ফুট—অর্থাৎ তালগাছের সমান উঁচু ।

সেদিন যে কুমীর-কাঙ্গারু আমাদেরকে তাড়া করেছিল, এ জানোয়ারগুলোকে দেখতে প্রায় তারই মতন, তফাৎ খালি এই যে, এগুলো লম্বা-চওড়ায় তার চেয়েও প্রায় দুগুণ বড় !

আমি তাড়াতাড়ি গুণে দেখলুম, দলের ভিতরে প্রায় নব্বইটা জানোয়ার রয়েছে । কোন কোনটা ল্যাজ ও পিছনের দুই পায়ে ভর দিয়ে দাঁড়িয়ে, মস্ত-উঁচু গাছের আগডাল সামনের দুই পা বা হাত দিয়ে ভেঙে নিয়ে চর্ষণ করছে ! কোন-কোনটা কাঙ্গারুর মত লাফিয়ে এদিকে-ওদিকে যাচ্ছে । আবার কোন কোনটা চুপ ক'রে বসে আছে । কতকগুলো অপেক্ষাকৃত ছোট

জীব পরস্পরের সঙ্গে খেলা করছে—নিশ্চয়ই সেগুলো বাচ্চা! কিন্তু বাচ্চা হ'লেও মাথায় তারা প্রায় হাতীর মতই উঁচু!

আমি চুপি চুপি বললুম, “বিমল, এগুলো ডাইনসর!”

বিমল বললে, “বন থেকে বেরুতে গেলে এদের স্মুথ দিয়ে যেতে হয়। এখন উপায়?”

—“যতক্ষণ না এরা বিদায় হয়, ততক্ষণ আমাদের বনের ভেতরেই ব'সে থাকতে হবে! তা ছাড়া আর কোন উপায় তো দেখি না!”

বাঘা এতক্ষণ ভেঙে বোবা হয়ে পেটের তলায় ল্যাজ গুটিয়ে জীবগুলোকে দেখছিল—হঠাৎ, বনের ভিতর দিকে ফিরে গৌঁ গৌঁ ক'রে উঠল! আমরাও পিছন ফিরে দেখলুম বনের অন্ধকারের ভিতর থেকে বড় বড় গাছ ছুলিয়ে আর-একটা প্রকাণ্ড কি জানোয়ার আমাদের দিকেই এগিয়ে আসছে!

রামহরি মড়ার মতন ফ্যাকাসে মুখে বললে, “খোকাবাবু, এবারে আর আমাদের রক্ষা নেই!”

সত্য কথা! বনের ভিতরে আর বাইরে—দুদিকেই সান্ধাৎ মৃত্যু আমাদের চোখের সামনে বিরাজ করছে,

স্বাক্ষর

পালার কোন পথই আর খোলা নেই! এবারে
বন্দুকের সাহায্যেও আত্মরক্ষা করতে পারব না, কারণ
বন্দুকের শব্দে সমস্ত জীবগুলোই ক্ষেপে গিয়ে
একসঙ্গে আমাদের আক্রমণ করতে পারে!

হতাশ হয়ে মরণের অপেক্ষায় আমরা তিনজনে
পাথরের মূর্তির মতন দাঁড়িয়ে রইলুম।

এগারো

অরণ্যের বিভীষিকা

বনের ভিতর থেকে যে-শব্দটা আসছিল, হঠাৎ তা
থেমে গেল ! তারপর খানিকক্ষণ আর কোন সাড়া
নেই ।

আমরা তখনো তেমনি আড়ষ্ট হয়েই দাঁড়িয়ে
রইলুম—প্রাণের আশা ছেড়ে দিয়ে !

রামহরি হঠাৎ আমার গা টিপলে । তার দিকে
ফিরতেই সে বনের উপর-পানে অঙ্গুলি নির্দেশ করলে !

মাথা তুলে যা দেখলুম, তাতে আমার দেহের রক্ত
যেন জল হয়ে গেল !

আমাদের কাছ থেকে মাত্র হাত-পনেরো তফাতেই
বনের ফাঁকে একখানা ভয়ঙ্কর বিক্রী এবং প্রকাণ্ড মুখ
জ্বলে আছে ।

আমরা তিনজনেই আন্তে আন্তে সেইখানে গুড়ি
মেরে ব'সে পড়লুম । •

সাহসিকানন্দ

বিমল চুপি-চুপি বললে, “আবার সেই কুমীর-
কাঙ্গারু !”

রামহরি বললে, ‘কিন্তু ও আমাদের দিকে তো
তাকিয়ে নেই !’

হ্যাঁ, সে তাকিয়ে আছে বনের বাইরের দিকে !

বিমল বললে, “ডাইনসরের দিকে চেয়ে আছে—
আমাদের দেখতে পায়-নি !”

ডাইনসরগুলো তখনো নিশ্চিত মনে মাঠের ভিতরে
বিচরণ করছিল ।

সেই ভীষণ মুখখানা আবার গাছের আড়ালে অদৃশ্য
হয়ে গেল ! কিন্তু তার পরেই দেখলুম, তার বিরাট দেহ
গুড়ি মেরে জঙ্গলের ভিতর থেকে ধীরে ধীরে বেরিয়ে
আসছে !

কী যে তার অভিপ্রায় কিছুই বুঝতে না পেরে মনে
মনে আমরা ভগবানকে ডাকতে লাগলুম ।

কিন্তু একটু পরেই তার অভিপ্রায় বেশ বুঝা গেল !
সে তেমনি সন্তুর্পণে বৃকে হেঁটে বন থেকে বেরিয়ে
মাঠের ভিতরে গিয়ে পড়ল, তারপর ডাইনসরের দলের
দিকে আস্তে আস্তে অগ্রসর হ’তে লাগল !

আমি আশ্বস্তির নিঃশ্বাস ফেলে বললুম, “বিমল,

এখনি আমরা সেকলে বিয়োগান্ত নাটকের একটা আধুনিক অভিনয় দেখতে পাব ! এই কুমীর-কাঙ্গারু যাচ্ছে ঐ ডাইনসরদের আক্রমণ করতে !”

বিমল আশ্চর্য্য স্বরে বললে, “ডাইনসরদের আক্রমণ করতে ? কিন্তু কুমীর-কাঙ্গারু পারবে কেন ? একে ডাইনসররা আকারে ওর চেয়ে ছুগুণ বড়, তার ওপরে গুন্তিতেও তারা যে নব্বইটার কম নয় !”

আমি বললুম, “বাঘের চেয়ে ঘোড়া বা জিরাফ তো ঢের বড়, কিন্তু ঘোড়া বা জিরাফের দলে যদি বাঘ পড়ে, তাহ’লে তাদের কি অবস্থা হয় জানো তো ? কুমীর-কাঙ্গারু মাংসাশী আর হিংস্র, নিরামিষ-ভক্ত ডাইনসরের চেয়ে আকারে ছোট হ’লেও তার গায়ের জোরও ঢের বেশী !”

রামহরি উৎসাহিত কণ্ঠে বললে, “দেখুন, দেখুন !”

চেয়ে দেখলুম কুমীর-কাঙ্গারুটা তখন ডাইনসরদের খুব কাছে গিয়ে পড়েছে । হঠাৎ ডাইনসররাও তাকে দেখতে পেলে এবং পর-মুহূর্ত্তেই আর্তনাদে সারা বন কাঁপিয়ে লাফাতে লাফাতে বেগে পলায়ন করতে লাগল । কুমীর-কাঙ্গারুও ভীষণ এক গর্জন ক’রে

মাস্তাকানন

তাদের পশ্চাৎ অনুসরণ করলে এবং দেখতে দেখতে একটা ডাইনসরকে ধ'রে ফেললে।

তারপর যে ভয়াবহ দৃশ্যের অভিনয় হ'ল, তা আর বর্ণনীয় নয়! মানুষের চোখ এমন দৃশ্য বোধ হয় আর কখনো দেখে-নি। ডাইনসরটা যদিও আকারে অনেক বড়, তবু কুমীর-কান্দারুটা মস্ত এক লাফ মেরে বিষম বিক্রমে তার গলার তলাটা কামড়ে ধ'রে তাকে মাটির উপরে পেড়ে ফেললে। তাদের গর্জনে ও আর্তনাদে আমাদের কাণ যেন কাশা হয়ে গেল, লাদুল আফালনে এবং লাফালাফির চোটে চারিদিকে রাশি-রাশি ধূলো উড়তে লাগল ও পৃথিবীর বুক ধর্-ধর্ ক'রে কাঁপতে লাগল, এদিকে-ওদিকে তিন-চারটে প্রকাণ্ড বৃক্ষ মাটির উপরে ভেঙে লুটিয়ে পড়ল! ঘণ্টাখানেক পরে সেই অদ্ভুত যুদ্ধ সমাপ্ত হ'ল। তখন দেখা গেল, ডাইনসরের বিপুল দেহ মাঠের উপরে স্থির হয়ে প'ড়ে আছে এবং কুমী:-কান্দারু পিছনের দুই পা ও ল্যাজের উপর ভর দিয়ে ব'সে হাঁ ক'রে হাঁপাচ্ছে এবং তার মুখের দুই পাশ ও দেহ দিয়ে হু হু ক'রে রক্তের স্রোত ছুটছে! খানিক বিশ্রামের পর মাটির উপরে ল্যাজ আছ'ড়াতে আছ'ড়াতে সে আকাশ-পানে মুখ তুলে কয়েকবার

গগনভেদী জয়নাদ করলে, তারপর মৃত ডাইনসরের দেহটা ভক্ষণ করতে প্রবৃত্ত হ'ল। সে এক বাঁভৎস দৃশ্য এবং সন্ধ্যা পর্য্যন্ত আমাদের ভীত চক্ষের সামনে সেই দৃশ্যের অভিনয় চলল।

সন্ধ্যার অন্ধকারে চারিদিক আচ্ছন্ন হয়ে গেল, আমরা কিন্তু তখনো বাইরে পা বাড়াতে সাহস করলুম না।

বিমল উদ্ভিন্ন স্বরে বললে, “কি হবে বিনয়বাবু! খাবারের খোঁজে এসে এদিকে অনাহারে প্রাণ যে যায়!”

আমি মনের ছুশ্চিত্তা গোপন ক'রে বললুম, “কোনই উপায় নেই। আজকের রাত এই বনের ভেতরই আমাদের কাটাতে হবে। এখন বন থেকে বেরুলেই মৃত্যু!”

রামহরি বললে, “কিন্তু কালও হয় তো আমরা পথ খুঁজে পাব না।”

আমি বললুম, “আমরা এসেছি পূর্বদিকে। কাল সূর্য্য উঠলে পর আমরা পশ্চিম দিকে অগ্রসর হব। তাহলে আমরা যে পথে এসেছি সে পথ না পেলেও খুব সম্ভব হ্রদের ধারে গিয়ে পড়তে পারব।”

মাস্তাকানন

বনের ভিতরে রাত ঘনিরে এল, সঙ্গে সঙ্গে নানারকম বিভীষিকার সূত্রপাত হ'ল! এতক্ষণ যে বিশাল অরণ্যে কেবল পত্রমন্দের ছাড়া আর কোন শব্দ শোনা যাচ্ছিল না, এখন তার চারিদিকেই নানারকম অদ্ভুত আওয়াজ শোনা যেতে লাগল! নিবিড় অন্ধকারে কিছু দেখা যাচ্ছে না; শোনা যাচ্ছে খালি শব্দ! গাছের উপরে শব্দ, জঙ্গলের ভিতরে শব্দ, আমাদের আশেপাশে শব্দ! কোন শব্দ গাছের উপরে ওঠা-নামা করছে, কোন শব্দ চারিদিকে আনাগোনা করছে, কোন শব্দ যেন এক জায়গাতেই স্থির হয়ে দাঁড়িয়ে আছে। বেশ বুঝতে পারলুম, আমাদের খুব কাছ দিয়েই অনেকগুলো অতিকায় জীব আসা-যাওয়া করছে, কারণ তাদের পায়ের চাপে পৃথিবীর মাটি থেকে থেকে কেঁপে উঠছে! সে-সব জীবের আকার যে কত ভয়ানক, ভগবানই তা জানেন! আমরা তিনজনে আতঙ্কে ও ক্ষুধা-তৃষ্ণায় প্রায় মরোমরো হয়ে চুপ ক'রে সেইখানেই বসে রইলুম. জড় পাষণের মত!

হঠাৎ রামহরি চৈঁচিয়ে উঠল এবং পর-মুহূর্তেই কে এক ধাক্কা মেরে আমাকে মাটির উপরে ফেলে দিলে

এবং আমি উঠে বসবার আগেই একটা প্রকাণ্ড ভারি দেহ আমার বুকের উপর চেপে বসল। কে যে আমাকে এমন অতর্কিতে আক্রমণ করলে, অন্ধকারে কিছুই দখতে পেলুম না, কিন্তু তার দেহের চাপে আমার দেহের হাড়গুলো যেন ভেঙে যাবার মতন হ'ল। সৌভাগ্যক্রমে বন্দুকটা তখন আমার হাতেই ছিল, কোন রকমে বন্দুকের নলটা আক্রমণকারীর দেহে লাগিয়ে এক হাতেই আমি ঘোড়া টিপে দিলুম, সঙ্গে সঙ্গে বিকট এক আর্তনাদ ক'রে সে জীবটা আমাকে ছেড়ে দিয়ে মাটির উপরে প'ড়ে গেল এবং তার পরেই পায়ের শব্দ শুনে বুঝলুম, সে বেগে পলায়ন করছে!

বিমল ব'লে উঠল, “কি হ'ল, কি হ'ল রামহরি?”

রামহরি বললে, “কে আমার পা মাড়িয়ে দিয়ে গেল!”

আমি উঠে বসে বললুম, “কি-একটা জানোয়ার আমার বুকের ওপরে চেপে বসেছিল, কিন্তু আমার বন্দুকের গুলি খেয়ে সে পালিয়ে গেছে!”

বিমল বললে, “কিন্তু এখনি যে বিকট আর্তনাদ শুনলুম, সে তো জানোয়ারের চীৎকার নয়, সে যে মানুষের চীৎকার!”

মাস্তাকানন

আমি বললুম, “আমারও তাই মনে হ’ল ! কিন্তু বন্দুকের বিছ্যাতির মতন আলোতে আমি এক পলকের জন্মে যে জ্বলন্ত গোধ আর যে ধারালো দাঁতগুলো দেখতে পেয়েছি, তা তো মানুষের নয় ! তার গায়ে যে জানোয়ারের মতন বড় বড় লোম ছিল তাও আমি জানতে পেরেছি, কিন্তু আর কিছু জানবার সময় আমি পাইনি—সে জীবটা এসেচে আর পালিয়েচে দুই সেকেন্ডের মধ্যেই !”

সেই মুহূর্তেই অরণ্যের অন্ধকার ভেদ ক’রে আবার এক তীব্র আর্তস্বর জেগে উঠল ! ঠিক যেন কোন মানুষ মর্মান্ভেদী যাতনায় চীৎকার-স্বরে ক্রন্দন করছে !

বারো

অরণ্যের গর্ভে

সেই আর্তনাদ ! কিছুতেই আমরা তা ভুলতে পারলুম না, তার প্রতিধ্বনি যেন আরো ভীষণ হয়ে আমাদের বৃকের ভিতর ঘুরে বেড়াতে লাগল !

এই সেকেলে জীবের রাজ্যে, অমন মানুষের মতন স্বরে কেঁদে উঠল কে ? আমি এখানে একলা থাকলে ভাবতুম, এ আমার কাণের ভ্রম । কিন্তু আমাদের তিন জনেরই তো শোনবার ভুল হ'তে পারে না ! অথচ এ বনে মানুষ থাকা সম্ভব নয়, কারণ এই দ্বীপের কোথাও আজ পর্যন্ত আমরা মানুষের চিহ্নমাত্র দেখতে পাইনি ।

অন্ধকারে অবাক হয়ে ব'সে ব'সে আমি ভাবতে লাগলুম—আর ওদিকে বনের মধ্যে তেমনি নানারকম অদ্ভুত শব্দ ক্রমাগত শোনা যেতে লাগল ! ভয়ে আমরা কেউ আর কারুর সঙ্গে কথা পর্যন্ত কইতে সাহস

মায়াকানন

করলুম না—কি জানি, আবার যদি কোন ভয়ানক জীব শুনতে পেয়ে আমাদের আক্রমণ করতে আসে !

বনের ভিতরে সেই সব অজানা শব্দ শুনে আমার মনে হ'তে লাগল যে, অন্ধকারে যেন আমাদের বিরুদ্ধে কারা ষড়যন্ত্র করছে। ধুপ্ ধুপ্, ছুম্ ছুম্, খস্ খস্, মর্ মর্, সোঁ সোঁ, সর্ সর্ ! শব্দগুলো যেন চারিদিক থেকে ক্রমাগত বসচে—আমরা তোমাদের হত্যা করব, আমরা তোমাদের হত্যা করব, আমরা তোমাদের হত্যা করব !...নিবিড় অন্ধকারে দেহ ঢেকে চারিদিকে কারা যেন ওঁৎ পেতে ব'সে আছে, তাদের রক্তলোলুপ জ্বলন্ত দৃষ্টি আমরা যেন সর্বদা দিয়ে অনুভব করতে লাগলুম—মাঝে মাঝে কাদের আনাগোনা য় পায়ের শব্দ শুনি আর মনে হয়, ঐ ওরা এসে পড়ল—ঐ ওরা এসে পড়ল !...ওঃ, রাত যেন আর পোহাতেই চায় না, আমরা যেন চির-অন্ধকারের কাগাগারের মধ্যে আজীবনের জন্তে বন্দী হয়ে আছি আর চারিদিক থেকে সুধু সেই একই শব্দ শোনা যাচ্ছে—আমরা তোমাদের হত্যা করব, আমরা তোমাদের হত্যা করব, আমরা তোমাদের হত্যা করব !

আর একটা মারাত্মক বিপদ থেকে কোন গতিকে

বেঁচে গেলুম, ।.....হঠাৎ কার মাটি-কাঁপানো পায়ের
 শব্দ শুনলুম, তার পরেই মনে হ'ল, একজায়গায় অন্ধকার
 যেন আঝে ঘন হয়ে আমাদের দিকেই এগিয়ে আসছে ।
 সেই জলন্ত ঘনভূত অন্ধকারের মধ্যে ঠিক বাতাবি
 লেবুর মত বড় ছোটো আগুনের ভাঁটা জ্বল জ্বল ক'রে
 জ্বলছে—মাটি থেকে অনেক—অনেক উঁচুতে ! নিশ্চয়
 সে ছোটো কোনো অতিকায় জীবের চোখ ! জীবটা যে
 কোন্ জাতের তা বোঝা গেল না বটে, তবে তার
 নিঃশ্বাসের ছ-ছ শব্দ আমরা স্পষ্টই বুঝতে পারলুম ।
 তার পরেই মড় মড় ক'রে গাছ ভাঙার শব্দ হ'ল এবং
 সঙ্গে সঙ্গে সেই আগুনের ভাঁটা ছোটো ও চলন্ত
 অন্ধকারটা গভীরতর অন্ধকারের মধ্যে অদৃশ্য হ'য়ে
 গেল ! বোমাক্রান্ত দেহে একেবারে মাটির সঙ্গে গা
 মিশিয়ে মড়ার মত স্তব্ধ হয়ে আমরা শুয়ে রইলুম ।
 আর চারিদিক থেকে যেন সেই একই শাসানি শুনতে
 লাগলুম—হত্যা, হত্যা, আমরা তোমাদের হত্যা
 করব !.... .

দুশ্চিন্তা ও আতঙ্কে আমরা যখন পাগলের মতন
 হয়ে উঠেছি, পূর্ব-আকাশে তখন উষার ভোরের প্রদীপ
 ধীরে ধীরে জ্বলে উঠল । সঙ্গে সঙ্গে অরণ্যের মধ্যে

মাস্তাকানন

অন্ধকারের জীবদের আনাগোনার শব্দ আশ্চর্যরূপে
থেমে গেল ! আমরাও আশ্বাস্তির নিঃশ্বাস ফেলে উঠে
বসলুম ।

বিমল বললে, “কাল যে জীবটা আমাদের আক্রমণ
করতে এসেছিল, এই দেখুন তার রক্তের দাগ ! এত-
ক্ষণে নিশ্চয় সে ম’রে গেছে । আশুন বিনয়বাবু,
এইবারে দেখা যাক্, সেটা কি জীব !”

আমি আপত্তি ক’রে বললুম, “না, না, ক্ষুধা তৃষ্ণা
আর পরিশ্রমে আমরা মর’মর’ হয়ে পড়েছি,
এখন কেবল বন থেকে বেরুবার চেষ্টা করা ছাড়া আর
কোনদিকে যাওয়া উচিত নয়—কি জানি, আবার যদি
কোন নূতন বিপদে পড়ি !”

বিমল আমার আপত্তি শুন্লে না, সে মাটির
উপরে শুকনো রক্তের দাগ ধ’রে অগ্রসর হয়ে বললে,
“না বিনয়বাবু মানুষের মত কাঁদে কোন্ জীব, সেটা
দেখতেই হবে ! সে তো আর বেঁচে নেই, তবে আর
কিসের ভয় !”

বিমলের কথা শেষ হ’তে না হ’তেই বনের ভিতরে
ভয়ানক এক গর্জন শোনা গেল, সঙ্গে সঙ্গে বিমলও
ধম্কে দাঁড়িয়ে পড়ল ।

রামহরি বললে, “এ যে বাঘের ডাক !”

আবার সেই গর্জন— এবারে আরো কাছে ! তার পরেই ভারি ভারি পায়ের শব্দ—যেন মস্তবড় একটা জীব দৌড়ে আসছে !

আমি চোঁচিয়ে উঠলুম, “সাবধান বিমল, সাবধান !”

হাতীর মতন প্রকাণ্ড একটা জানোয়ার বনের ভিতর থেকে তীরবেগে বেরিয়ে এল, তার পরেই চোখের নিমিষে পাশের জঙ্গলের মধ্যেই অদৃশ্য হয়ে গেল ! জীবটা হাতীর মতন বড় বটে, কিন্তু দেখতে ঠিক ষাঁড়ের মতন !

বিমল আর রামহরির মুখে বিস্ময়ের চিহ্ন দেখে আমি বললুম, “ও হচ্ছে সেকালের ষাঁড় !”

বিমল বিস্ফারিত চোখে বললে, “হাতীর মতন বড় !”

—“হ্যাঁ। হাজার দুই বছর আগেও রোম্যানরা ঐ-রকম ষাঁড় জার্মান দেশে দেখেছিল।”

রামহরি বললে, “কিন্তু ও-ষাঁড় কি বাঘের মতন ডাকে !”

—“না, বাঘের ডাক শুনেই ষাঁড়টা পালিয়ে গেল। এ বনে সেকলে বাঘ আছে। সেকলে বাঘের গায়ে

মায়াকানন

এখনকার বাঘের মতন দাগ নেই, আকারেও তারা অনেক বড়, আর তাদের মুখের উপর-চোয়ালে ছোরার মতন লম্বা দুটো দাঁত আছে। বিমল, এ বাঘের বিক্রম কি-রকম বুঝে তো! এত বড় একটা ষাঁড় তার ভয়ে প্রাণপণে পালিয়ে গেল, আমাদেরও এখন এ বন ছেড়ে চলে যাওয়া উচিত!”

বিমল বললে, “আপনার কথাই ঠিক! কালকে আমাদের কে আক্রমণ করেছিল, তা আর দেখবার দরকার নেই, এ সর্ব্বশেষে বন থেকে এখন প্রাণ নিয়ে বেরুতে পারলে বাঁচি!”

পূর্বদিকে বনের মাথায় সূর্য্যকে দেখা গেল, প্রদীপ্ত কাঁচা সোনার অপূর্ব্ব মুকুটের মতন! কিন্তু এখানের বনের পাখী তাঁর আবাহন-গান গাইলে না। সূর্য্য শুধু নিরানন্দ নীরবতার মাঝে পৃথিবীর বুকে সোনার হাত বুলিয়ে দিতে লাগল।

আমরা এসেছি পশ্চিম দিক থেকে, তাই সেই দিকেই যাত্রা শুরু ক’রে দিলুম।

তেরো

নূতন বিশদের সূচনা

ক্ষুধার জন্মে যত না হোক, তৃষ্ণার তাড়নায় চলতে চলতে আমাদের প্রাণ ওষ্ঠাগত হয়ে উঠল। জলের অভাব যে কি ভয়ানক অভাব, জীবনে আজ প্রথম তা কল্পনা করতে পারলুম। চলতে চলতে প্রতিপদেই মনে হ'তে লাগল, এই বুঝি দম বন্ধ হয়ে যায়, এই বুঝি মাথা ঘুরে মাটিতে প'ড়ে গেলুম! মাথার মধ্যে যেন আগুনের আংরা জ্বলছে, মুখের ভিতর থেকে জিভটা বাইরে বেরিয়ে আসতে চাইছে, আর মন চাইছে, পথ চলা বন্ধ ক'রে সেইখানেই শুয়ে জীবনের সব লীলা সাজ করতে।

সেই ভোর থেকে হাঁটছি, আর হাঁটছি, সূর্য এখন মাঝ-আকাশে, তবু এই অভিশপ্ত অরণ্য যেন আর আমাদের মুক্তি দিতে চায় না। এ অরণ্য যেন অনন্ত

মাস্তাকানন

—এ অরণ্য যেন এক রাত্রের মধ্যে সারা পৃথিবীকে গ্রাস ক'রে ফেলেছে !

রামহরি ঠিক মাতালের মতন টলতে টলতে চলেছে, তার চোখছটো ঠিক পাগলের মতন হয়ে উঠেছে, আয়ারও প্রায় সেই অবস্থা।—কিন্তু ধন্য বটে বিমল ছেলেটি, সেও যে ভিতরে ভিতরে আমাদেরই মত কষ্ট পাচ্ছে, তাতে আর কোনই সন্দেহ নেই, কিন্তু তার মুখে চোখে বা ভাবভঙ্গীতে সে-কষ্টের কোন লক্ষণই ফুটে ওঠে নি, ধীর প্রশান্ত ভাবে হাসিমুখে সে আমাদের আগে আগে অগ্রসর হচ্ছে !

শেষটা রামহরি একেবারে হাল ছেড়ে দিয়ে ব'সে পড়ল।

বিমল বললে, “ওকি রামহরি, বসলে কেন ?”

রামহরি কাতরভাবে বললে, “খোকাবাবু, জল না খেলে আমি আর চলতে পারব না।”

—“আর একটু পরেই জল পাব, ওঠ রামহরি, ওঠ।”

—“না খোকাবাবু, না,—এ রাজ্যের সব জল শুকিয়ে গেছে, জল আর পাব না। জল না পাই, আমাকে শান্তিতে মরতে দাও। তোমরা চলে যাও, আমার জন্মে ভেব না।”

বিমল আর কিছু বললে না, হেঁট হয়ে রামহরিকে ঠিক শিশুর মতন নিজের কাঁধের উপরে তুলে নিয়ে অনায়াসেই আবার হাঁটতে শুরু করলে। আমি তো দেখে শুনে অবাক্। বলবান ব'লে আমার নিজের যথেষ্ট খ্যাতি আছে, কিন্তু আজ দুদিনের অনাহার, পথ-শ্রম ও তৃষ্ণার তাড়না সহ্য করবার পর রামহরির মতন একজন লোককে ঘাড়ে ক'রে পথ চলাব শক্তি যে কত খানি বল বিক্রম ও কষ্টসহিষ্ণুতার কাজ, তা বুঝতে পেরে মনে মনে বিমলকে আমি বার বার ধন্যবাদ দিতে লাগলুম।

ভারপর যখন নিরাশার চরম সীমায় গিয়ে দাঁড়িয়েছি এবং প্রাণের আশা ছেড়ে আমিও রামহরির মতন শুয়ে পড়ব ব'লে মনে করছি তখন আর্চাম্বতে বনের ফাঁকে জেগে উঠল, ও কী কল্পনাতীত দৃশ্য!

চোখের সামনে স্পষ্ট দেখলুম, বিশাল হ্রদের নীল জল অদূরেই টলটল চলচল করছে—সূর্যকিরণে বিছ্যতের মতন চম্কে চম্কে উঠছে।

কিন্তু এ চোখের ভ্রম নয় তো? সত্যিই কি বন শেষ হয়েছে, আমরা আবার হ্রদের তীরে এসে পড়েছি?

বিমলের হাত ছাড়িয়ে রামহরি মাটির উপরে

মাস্তাকানন

লাফিয়ে পড়ল, তার পর পাগলের মতন চ্যাঁচাতে চ্যাঁচাতে হুদের দিকে দৌড় দিলে, আমিও তার পিছনে পিছনে ছুটতে লাগলুম—তারই মতন আনন্দে উদ্ভ্রান্ত হয়ে।আমরা তিনজনে মিলে যতক্ষণ পারলুম প্রাণ ভ'রে জল পান করলুম! আহা, সে যে কি তৃপ্তি, কি আনন্দ, কেমন ক'রে তা বর্ণনা করব? শেষটা পেটে যখন আর ধরলো না, তখন আমরা বাধ্য হয়ে ক্ষান্ত হলুম।

রামহরি আহ্লাদে নাচতে নাচতে বললে, “আ, আর আমার কোন কষ্ট নেই, এখন আবার আমি একশো ক্রোশ হাঁটতে পারি!”

আমারও সমস্ত শক্তি আবার ফিরে পেলুম।

বিমল ইতিমধ্যে গোটাকয়েক সেকলে ডানাহীন হাঁস শিকার ক'রে ফেললে, আমরা সাঁতার দিয়ে তাদের দেহগুলো জল থেকে ডাঙায় এনে তুললুম।

রামহরি মুখ চোকলাতে চোকলাতে বললে, “খোকাবাবু, আমার আর দেরি সইবে না, চল, চল, তাড়াতাড়ি বাসায় ফিরে রান্না শুরু করে দিই!”

আমি বললুম, “হ্যাঁ বিমল, আমাদের আর দেরি

করা উচিত নয়, কুমার আর কমল এতক্ষণে আমাদের
জগে ভেবে হয়তো আকুল হয়ে উঠেছে।”

বিমল উঠে দাঁড়িয়ে বললে, “হ্যাঁ, চলুন এইবার।
আমরা তো বাসায় প্রায় এসে পড়েছি—এ যে আমাদের
পাহাড় দেখা যাচ্ছে!”

আমরা সবাই আবার অগ্রসর হলাম। একবার
জলপানের পরে আমাদের দেহে আবার নূতন শক্তির
সঞ্চার হয়েছিল, তাই এবারে পথ চলতে কোনই কষ্ট
হ’ল না। কিন্তু এ দীপে বিপদ দেখি পদে পদে।
আমরা যখন পাহাড়ের খুব কাছেই এসে পড়েছি মাথার
উপরে তখন হঠাৎ শুনতে পেলুম এক বিশ্রী চীৎকার!
উপরে চেয়ে দেখি ছোটো হাড়-কুৎসিত গরুড়-পাখী
চক্রাকারে ঘুরতে ঘুরতে আমাদের দিকে নেমে আসছে।

তাদের উদ্দেশ্য যে ভালো নয়, তা বুঝতে আমাদের
কিছুমাত্র বিলম্ব হ’ল না। বিমলের বন্দুক তখনই
গর্জন করে উঠল, সঙ্গে সঙ্গে একটা পাখী গুলি খেয়ে
মাটির উপরে এসে পড়ল। পাখীটা সাংঘাতিকরূপে
আহত হয়েছিল, কিন্তু সেই অবস্থাতেই কবীরের মত
দাঁত-ওয়ালা চঞ্চু তুলে সে আমাদের আক্রমণ করতে
এল! বিমল বন্দুকের কুঁদো দিয়ে প্রবল এক আঘাতে

মাস্তাকানন

তার মাথাটা চূর্ণ ক'রে দিলে! ততক্ষণে আমার বন্দুকের গুলিতে দ্বিতীয় পাখীটারও ভব-লীলা সঙ্গ হয়ে গেল।

আমরা খানিকক্ষণ দাঁড়িয়ে দাঁড়িয়ে সেই সৃষ্টি-ছাড়া জীব ছটোকে অবাক হয়ে দেখতে লাগলুম। বৈজ্ঞানিকেরা যে কি দেখে এদের পাখী ব'লে স্থির করেছেন তা সুধু তাঁরাই জানেন, কারণ পাখীদের সঙ্গে এই বীভৎস জীবগুলোর কিছুই মেলে না, তাদের দেহ পালক-হীন ও সরীসৃপের মতন, দাঁতওয়ালা চঞ্চু আর পা হচ্ছে চারখানা ও লেজ হচ্ছে দড়ির মতন। কিন্তুত-কিমাকার!

এমন সময় বাঘার চীৎকার শুনলুম—ঘেউ, ঘেউ, ঘেউ! মুখ তুলে দেখলুম, চ্যাঁচাতে চ্যাঁচাতে সে আমাদের দিকেই বেগে ছুটে আসছে।

রামহরি বললে, “ওকি, বাঘা খোঁড়াচ্ছে কেন?”

সত্যিই তো, বাঘা ছুটে আসছে বটে, কিন্তু খোঁড়াতে খোঁড়াতে, পিছনের একখানা পা তুলে! তার চীৎকারেও আজ যেন কেমন কাতরতা মাখানো!

বাঘা ছুটে এসে একেবারে আমাদের পায়ের কাছে লুটিয়ে প'ড়ে হাঁপাতে লাগল।

বিমল হেঁট হয়ে প'ড়ে বিস্মিত কণ্ঠে বললে, “বিনয়-
বাবু, বিনয়বাবু, দেখুন ! বাঘার গায়ে রক্ত !”

হ্যাঁ, বাঘার সর্বাঙ্গ ক্ষতবিক্ষত ও রক্তাক্ত !

বিমল পাহাড়ের দিকে ছুটতে ছুটতে বললে,
“শীগ্গির আশুন, কুমার আর কমল বোধ হয় কোন
বিপদে পড়েছে !”

আমি আর রামহরিও পাহাড়ের দিকে ছুট্ দিলুম ।

পাহাড়ের উপরে উঠেও কোন গোলমাল শুনতে
পেলুম না । কিন্তু গুহার সামনে গিয়ে দেখলুম,
সেখানে পাহাড়ের পাথর রক্তে একেবারে রাঙা হয়ে
উঠেছে !

বিমল ঝড়ের মতন গুহার ভিতরে ঢুকে, আবার
বেরিয়ে এসে বললে, “গুহার ভিতরে তো কেউ নেই !
কুমার, কুমার !”

কেউ সাড়া দিলে না ।

আমি চৈঁচিয়ে ডাকলুম, “কুমার ! কমল !”

কোন সাড়া পেলুম না ।

বিমল করুণ স্বরে বললে, “এত রক্ত কিসের বিনয়-
বাবু, এত রক্ত কিসের ? তবে কি তারা আর বেঁচে
নেই ?”

মাহাকানন

আমি বললুম, “হয় তো তারা সমুদ্রের ধারে গিয়েচে। এস, পাহাড় থেকে নেমে খুঁজে দেখি গে!”

সকলে আবার পাহাড় থেকে নেমে গেলুম। কিন্তু নীচে গিয়ে দেখলুম, সমুদ্রের ধারে জনমানব নেই।

বিমল মাথায় হাত দিয়ে সেইখানেই বসে পড়ল, রামহরি চাঁৎকার করে কেঁদে উঠল, বাঘাও সেই সঙ্গে যোগ দিয়ে আকাশের দিকে মুখ তুলে কাঁদতে লাগল, কেঁউ, কেঁউ, কেঁউ!

হঠাৎ বালির উপর আমার চোখ পড়ল। তাড়াতাড়ি বিমলকে ডেকে আমি বললুম, “দেখ, দেখ, এ আবার কি ব্যাপার?”

—“কি বিনয়বাবু, কি?”

—“পায়ের দাগ!”

—“পায়ের দাগ! কার পায়ের দাগ?”

—“মানুষের!”

—“তাই তো, একটা ছোটো নয়, এ যে অনেক-গুলো। এ আবার কি রহস্য বিনয়বাবু?”

—“বেশ বোঝা যাচ্ছে এখানে একদল মানুষ এসেছিল।”

—“কিন্তু আমরা ছাড়া এ ছোপে তো আর মানুষ নেই !”

—“নিশ্চয় আছে, নইলে মানুষের পায়ে দাগ এখানে এল কেমন ক’রে ? বিমল, কাল রাত্রে আমরা ভুল শুনিনি, বনের ভিতরে কাল নিশ্চয়ই মানুষ আর্ধনাদ করেছিল।”

বিমল নিষ্পলক নেত্রে বালির উপরে ঝাঁকি সেই পদচিহ্নগুলোর দিকে তাকিয়ে নির্বাকভাবে দাঁড়িয়ে রইল !

ছোদ

চোখের মাল্লা

এ দ্বীপেও তাহ'লে মানুষ আছে !

কাল রাত্রেই, সেই ভয়ানক বনের নিবিড় অন্ধকারের ভিতরে ব'সে এই সন্দেহটা প্রথমে আমার মনের ভিতরে ছেগে উঠেছিল। তারপর আজকে বালির উপরে এই পায়ের দাগ ! এ দাগগুলো যে মানুষেরই পায়ের ছাপ, তাতে আর কোনই সন্দেহ নেই !

এতদিন যে দ্বীপকে জনহীন ব'লে মনে করতুম, আজ সেখানে মানুষ আছে জেনে প্রথমটা আমার মন পুলকিত হয়ে উঠল ! কিন্তু তারপরেই মনে হ'ল, এখানে মানুষ থাকলেও তারা কি আমাদের বন্ধু হবে ? তারা কি আমাদেরই মতন সভ্য ? এই যে কমল আর কুমারের কোন খোঁজ পাওয়া যাচ্ছে না, এ ব্যাপারের সঙ্গে কি তাদের কোনই সম্বন্ধ নেই ?

কুমার আর কমল কোথায় গেল ? বাঘার সর্বাঙ্গ রক্তাক্ত, গুহার সামনেটা রক্তে ভেসে গেছে, এখানে অজানা মানুষের পায়ের দাগ, এ-সব দেখে বেশ বোঝা যাচ্ছে যে এখানকার মানুষরা হয় তাদের বন্দী, নয় হত্যা করেছে !

রামহরি আকুল কণ্ঠে বললে, “বাবু, বাবু ! নিশ্চয় কোন রাক্ষুসে জানোয়ার এসে কুমার আর কমল বাবুকে খেয়ে ফেলেচে !”

বিমল এতদূর অভিভূত হয়ে পড়েছিল যে, সে আর কোন কথাই কইতে পারলে না, দুই হাতে মুখ ঢেকে বািলির উপরে সে হেঁট হয়ে বসে রইল ।

আমি তার হাত ধরে নাড়া দিয়ে বললুম, “বিমল, ওঠ, ওঠ !”

বিমল মুখ তুলে হতাশ ভাবে বললে, “উঠে কি করব বিনয়বাবু !”

আমি বললুম, “কুমার আর কমলকে খুঁজতে যেতে হবে যে !”

অশ্রুপূর্ণনেত্রে বিমল বললে, “আর কি তারা বেঁচে আছে ?

আমি বললুম, “আমার বিশ্বাস তারা মরে-নি ।

স্বাক্ষর

এই বালির ওপরে যাদের পায়ের দাগ রয়েছে, তারাই তাদের ধরে নিয়ে গেছে।”

শুনেই বিমলের হতাশ ভাব চলে গেল ! একজাফে দাঁড়িয়ে উঠে সে বললে, “এ কথা তো এতক্ষণ আমার মনে হয়-নি ! চলুন তবে ! তারা যদি বন্দী হয়ে থাকে তাহলে তাদের উদ্ধার করতেই হবে !”

আমি বললুম, “দাঁড়াও বিমল, এতটা ব্যস্ত হলে চলবে কেন ? আগে আমরা খাওয়া-দাওয়া সেরে নি !

বিমল বললে, “বন্ধুরা শত্রুর হাতে, এখন আমরা পেটের ভাবনা ভাবব !”

আমি বললুম, “না ভাবলে তো উপায় নেই ভাই ! কাল থেকে অনাহারে আছি, আজ কিছু না খেলে শরীর আমাদের ভার বহিতে রাজি হবে কেন ? কুমার আর কমলের খোঁজে পথে পথে এখন ক’দিন কাটবে কে বলতে পারে ?”

অত্যন্ত অনিচ্ছার সঙ্গে বিমল আমাদের সঙ্গে আবার গুহার ভিতরে ফিরে এল । রামহরি সেকলে ডানাহীন হাঁসগুলোর পালোক ছাড়িয়ে তাড়াতাড়ি উড়ুনে আগুন দিলে... ..

যেমন-তেমন করে খানিকটা সিদ্ধ মাংস খেয়ে এবং

পথে খাবার জন্তে আরো-খানিকটা মাংস সঙ্গে নিয়ে আমরা তিনজনে যখন আবার বেরিয়ে পড়লুম,—সূর্য তখন পশ্চিমে নামতে শুরু করেছে।

আমার ইচ্ছা ছিল আজ বিশ্রাম ক'রে কাল ভোরবেলায় কুমার আর কমলের খোঁজে বেরিয়ে পড়ব। কিন্তু এটুকু দেরিও বিমলের সইল না। অথচ সে একবারও ভেবে দেখলে না যে, ঘণ্টা-কয় পরে রাত হ'লেই আমাদের পথের মধ্যেই নিশ্চেষ্ট হয়ে ব'সে থাকতে হবে—কারণ বেলা থাকতে থাকতে এই অল্প সময়ের মধ্যে, নিশ্চয়ই আমরা কুমার আর কমলের কোন খোঁজই পাব না।

সমুদ্রের তীরে গিয়ে বালির উপরে সেই পদচিহ্নগুলো দেখে আমরা অগ্রসর হ'তে লাগলুম। বাঘা কিছুতেই একলা গুহার ভিতরে থাকতে রাজি হ'ল না, কাজেই তাকেও সঙ্গে নিতে হয়েছে। সে খোঁড়াতে খোঁড়াতে আমাদের আগে আগে চলল।

পাহাড় আর সমুদ্রের মাঝখান দিয়ে বালির উপরে অসংখ্য পায়ের দাগ বরাবর চলে গেছে। দাগগুলো এত স্পষ্ট যে অনুসরণ করতে আমাদের কোনই কষ্ট

মায়াকানন

হ'ল না। ছাঁপের য়েদিকে যাচ্ছি এদিকে আমরা আগে আর কখনো আসিনি, এদিকটায় যতদূর চোখ চলে দেখতে পাচ্ছি খালি পাহাড়ের পর পাহাড় ! অধিকাংশ পাহাড়ই ছোট ছোট—নব্বই কি একশো ফুটের বেশী উঁচু নয়। সেই সব পাহাড়ের মাঝে মাঝে ছোট-বড় বন-জঙ্গল। চলতে চলতে আমার মনে হ'তে লাগল, ছাঁপের এই অজানা অংশে হয়তো সেকালের আরো কত রকমের ভীষণ জীব বাস করে ! আজ রাত্রেই হয়তো তাদের অনেকের সঙ্গে দেখাশুনা হয়ে যাবে, কালকের মত আজ রাত্রেও হয়তো প্রতিমূহূর্তেই চোখের সামনে মৃত্যু এসে মূর্তি ধ'রে দাঁড়াবে ! এ সব কথা ভাবতেও মন হাঁপিয়ে উঠতে লাগল—এমন নিত্য নব বিপদের সঙ্গে যুঝে যুঝে বেঁচে থাকাও আমার কাছে যেন মিথ্যা ব'লে মনে হ'ল—না আছে আনন্দ, না আছে শান্তি, না আছে ছ'দও বিশ্রাম,—একে কি আর জীবন বলে ? এই তো আমাদের ছুজনকে আর দেখতে পাচ্ছি না, আর দেখতে পাব কি না তাও জানি না, এমনি বিপদের মধ্য দিয়ে যেতে যেতে একে একে আমাদেরও লীলাখেলা সাক্ষ হয়ে যাবে—দেশের কেউ আমাদের কথা জানতেও

পারবে না, মরবার সময়ে আত্মীয়-স্বজন বন্ধুবান্ধবের মুখ পর্য্যন্ত দেখতে পাব না !

ভাবতে ভাবতে পথ চলছি। বিমল আর রামহরির মুখেও কোন কথা নেই, তারাও বোধ হয় আমারই মতন ভাবনা ভাবছে ! ঘণ্টা-দুই পরে সূর্য্য পশ্চিম-আকাশের মেঘের দরজা খুলে অদৃশ্য হয়ে গেল, সমুদ্রের নীলজলের উপরে আসন্ন সন্ধ্যার ছায়া ধীরে ধীরে ছড়িয়ে পড়তে লাগল।

আরো খানিকক্ষণ চলবার পরে আমরা যে-জায়গায় এসে দাঁড়ালুম, তার ছুদিকে ছুটো পাহাড় আর মাঝখানে অরণ্য। পায়ের দাগ বেঁকে সেই বনের ভিতরে চ'লে গেছে।

আমি বললুম, “বিমল, সামনেই রাত্রি, এখন এ বনের ভিতরে যাওয়া কি উচিত ?”

বিমল বললে, “না গেলেও তো চলবে না !”

আমি বললুম, “কিন্তু গিয়েও তো কোন লাভ নেই ! অন্ধকারে পায়ের দাগ দেখা যাবে না, আমরা যদি নিজেরাই কালকের মতন আবার পথ হারিয়ে ফেলি, তা হলে কুমার আর কমলকে উদ্ধার করবে কে ?”

বিমল বললে, “‘তাহ’লে উপায় ?”

মাস্তাকানন

—“আমার মতে আজকের রাতটা এই পাহাড়ের উপরে উঠে কোনরকমে কাটিয়ে দেওয়া উচিত। তারপর কাল ভোরে বনের ভিতরে ঢুকলেই চলবে।”

রামহরিও আমার মতে সায় দিলে।

বিমল একটা নিঃশ্বাস ফেলে বললে, “আচ্ছা।”

ঠিক সেই সময়ে বাঘা হঠাৎ গৌঁ গৌঁ করে গজ্জরে উঠল। আমি সচমকে চারিদিকে তাকালুম, কিন্তু কোথাও কিছু দেখতে পেলুম না। বাঘার মাথায় একটা চাপড় মেরে আমি বললুম, “চুপ কর্ বাঘা, চুপ কর্!”

সে কিন্তু চুপ করলে না, আরো কয় পা এগিয়ে গিয়ে তেমনি গজ্জরাতে লাগল।

রামহরি বললে, “বাঘা নিশ্চয় কিছু দেখেছে, ও তো মিথ্যে চ্যাঁচায় না!”

কিন্তু কি দেখেছে বাঘা? এদিকে ওদিকে তাকাতে তাকাতে হঠাৎ জঙ্গলের এক জায়গায় আমার নজর পড়ল—কারণ সেখানকার গাছপালা অল্প অল্প কাঁপছিল!

তু পা এগিয়েই আমি চম্কে দাঁড়িয়ে পড়লুম, সবুয়ে দেখলুম, গাছের পাতার ফাঁকে, অন্ধকারের ভিতর থেকে দুটো ভীষণ চোখ জ্বল্-জ্বল্ করছে! সে

ক্রুর চোখের দৃষ্টি কী নিষ্ঠুর—কী তীব্র—তার মধ্যে
লেশমাত্র দয়া-মায়ার ভাব নেই! কে ওখানে গাছের
আড়ালে ব'সে অমন লোলুপ নেত্রে আমাদের পানে
তাকিয়ে আছে—সে কি জানোয়ার, মানুষ, না পিশাচ ?

সে চোখছটোর মধ্যে কি সাংঘাতিক আকর্ষণ ছিল
জানি না, কিন্তু নিজের ইচ্ছার বিরুদ্ধেও আমি পায়ে
পায়ে তার দিকে এগিয়ে যেতে লাগলুম। শুনেছি
সাপেরা কেবল চোখের চাউনি দিয়ে গাছের ডাল থেকে
পাখীদের মাটির উপরে টেনে এনে ফেলে—আমারও
সেই অবস্থা হ'ল নাকি ?

সেই ভয়ানক চোখের আকর্ষণে আচ্ছন্নের মতন
এগিয়ে যাচ্ছি,—হঠাৎ পিছন থেকে বিমল ডাকলে,
“বিনয়বাবু, বিনয়বাবু !”

পনেরো .

রামহরির মহাদেব-বন্দনা

বিমলের চীৎকারে আমার সাড় হ'ল, আমার চমক ভেঙে গেল, শিউরে উঠে আমি দাঁড়িয়ে পড়লুম। বুঝতে পারলুম আমি সাক্ষাৎ-মৃত্যুর মুখে এগিয়ে যাচ্ছিলুম।

বিমল তাড়াতাড়ি এসে আমার হাত চেপে ধ'রে বললে, “অমন ক'রে বনের ভেতরে ঢুকছিলেন কেন ?”

—“বনের ভেতরে, গাছের ফাঁকে ছুটো ভয়ানক চোখ দেখেছি। তোমরা কি কিছু দেখতে পাওনি ?”

বিমল আশ্চর্য্য স্বরে বললে, “চোখ ! কৈ, কোথায় ?”

—“ঐ যে, ঐখানে !” আঙুল তুলে বিমলকে জায়গাটা দেখিয়ে দিতে গিয়ে দেখি, সেই নিষ্ঠুর চোখ-ছুটো আর সেখানে নেই ! কিন্তু বাঘা তখনো জঙ্গলের দিকে তাকিয়ে চীৎকার করছিল !

—“বিমল, চোখছুটো ওখান থেকে সরে গেছে !”

—“আচ্ছা, আমি জঙ্গলের ভেতরটা একবার দেখে আসি!” ব’লেই বিমল অগ্রসর হ’ল, কিন্তু রামহরি তাড়াতাড়ি বিমলের পথরোধ ক’রে দাঁড়িয়ে বললে, “না না, সে কিছুতেই হবে না! জঙ্গলের ভেতরে নিশ্চয়ই ভূত আছে!”

বিমল বললে, “ভূত কি তোমার ঘাড় থেকে কখনো নামবে না, রামহরি? পথ ছাড়া, আমাকে দেখতে দাও!”

আমি বললুম, “বিমল, এই ভরস্ক্যেবেলায় তুমি আর গৌয়ার্তুমি কোরো :না! জঙ্গলের ভেতরে কি আছে, আজ আর তা দেখবার দরকার নেই। এস, এইবেলা আলো থাকতে থাকতে পাহাড়ের উপরে উঠে রাত কাটাবার ব্যবস্থা করি!”

অগত্যা বিমলকে আমার প্রস্তাবে রাজি হ’তে হ’ল। আমরা সকলে পাহাড়ে চড়তে শুরু করলুম। পাহাড়টা বেশী উঁচু নয়, তার মাথায় উঠতে আমাদের বিশেষ বেগ পেতে হ’ল না। উপরে গিয়ে একটা জায়গায় শ্রান্ত দেহে আমরা ব’সে পড়লুম।

পৃথিবীর বুকের উপরে সন্ধ্যা তখন তার আঁধার-অঞ্চল ধীরে ধীরে বিছিয়ে দিতে শুরু করেছে—অদূরে

মাহাকানন

সমুদ্রের নীল রং ছায়ার মায়ায় ক্রমেই ঝাপসা হ'য়ে আসছে। আকাশ এখানে ঠিক আমাদের দেশের মতই সুন্দর—এই দ্বীপের কোন বিভীষিকার আভাস তার নীলিমাকে ব্লান ক'রে দেয়নি। তবে বাংলাদেশে সন্ধ্যার সাড়া পেয়ে বকের দল যেমন নীলসায়রে খেত পদ্মের মালার মতন ছলতে ছলতে ভেসে যায়, সে ছবি এখানে কেউ দেখতে পায় না।

পাহাড়ের পাশের বনের দিকে তাকিয়ে একটি নূতনত্ব চোখে পড়ল। এই বনে যেমন বড় বড় গাছ আছে, দ্বীপের আর কোথাও তা নেই। অনেক গাছ আমাদের পাহাড়েরও মাথা ছাড়িয়ে চারিদিকে ডালপাতা বিস্তার ক'রে শূণ্যের দিকে উঠে গেছে,—গাছ যে এত উঁচু হ'তে পারে আগে আমার সে ধারণা ছিল না! এ-সব গাছের নাম বা জাতও আমার জানা নেই।.....

রাতটা নিরাপদেই কেটে গেল, জলাভাব ছাড়া আর কোন কষ্ট আমাদের ভোগ করতে হ'ল না।

সকালবেলায় পূর্বাকাশের নীলমুখ সবে যখন রাঙা হয়ে উঠেচে আমরা তখন পাহাড় থেকে আবার নীচে নেমে এসে দাঁড়ালুম।

কাল যে-জঙ্গলের ভিতরে সেই চোখছটো

দেখেছিলুম, আগেই বাঘা তার কাছে ছুটে গেল। তারপর জঙ্গলের আশপাশ খুব সম্ভরণে গলা বাড়িয়ে দেখে এবং ভালো ক'রে শুঁকে আবার সে ল্যাজ নাড়তে নাড়তে আমাদের কাছে শান্ত ভাবে ফিরে এল— বাঘার হাবভাব দেখেই আমরা বুঝতে পারলুম যে, জঙ্গলের ভিতরে আজ আর কোন শত্রু লুকিয়ে নেই।

আশ্বস্তির নিঃশ্বাস ফেলে আমরা সেই দুই পাহাড়ের মধ্যবর্তী অরণ্যের মধ্যে প্রবেশ করলুম। সে অরণ্য গভীর বটে কিন্তু খুব নিবিড় নয়। তার উপরে ছ-ধারের বড় বড় গাছের মাঝখান দিয়ে সুন্দর একটি পায়ে-চলা পথের রেখা একে বেকে বরাবর চলে গেছে। কারা এই বনের ভিতরে এমন পথের সৃষ্টি করেছে? নিয়মিত ভাবে আনাগোনা না করলে এমন পথ কখনো তৈরি হ'তে পারে না, কিন্তু কারা এখান দিয়ে আনাগোনা করে? আমাদের মনের ভিতরে কেবলই এই প্রশ্ন উঠতে লাগল, কিন্তু এ বিচিত্র রহস্যের কোনই কিনারা ক'রে উঠতে পারলুম না।

সেই পথ ধরেই অগ্রসর হ'তে লাগলুম। চারিদিকে গাছপালা আর বন-জঙ্গল স্থির হয়ে দাঁড়িয়ে আছে—

মাস্তাকানন

মাঝে মাঝে অল্প হাওয়ায় ভোরের আলোতে চিকণ গাছের পাতাগুলো অস্ফুট আর্তনাদের মতন অস্পষ্ট আওয়াজ ক'রে কেঁপে কেঁপে উঠছে মাত্র, তা ছাড়া আর কোন দিকেই কোন জীবনের লক্ষণ নেই ! এ নিস্তরতা কেমন যেন অস্বাভাবিক ! :বনের আশেপাশে রোদের সোনালী আভা দেখে আমার মনে হ'তে লাগল, গভীর রাত্রির নীরবতার মাঝখানে সে যেন চোরের মতন চুপিচুপি ঢুকে পড়েছে ! তার উপর আর এক অসোয়াস্তি ! সেই অতিকায় সেকলে জীবের অরণ্যের মধ্যে ঢুকে আমাদের মনে যে অমানুষিক বিভীষিকার ভাব জেগে উঠেছিল, এখানেও বৃক্কের ভিতরে তেমনি একটা আতঙ্কের আভাস জাগতে লাগল ! কে যেন লুকিয়ে আমাদের সঙ্গে সঙ্গে আসছে, কারা যেন আড়াল থেকে আমাদের সর্ব্বাঙ্গে ক্ষুধিত চোখের চাউনি বুলিয়ে দিচ্ছে ! সামনে পিছনে, ডাইনে বাঁয়ে, উপরে নীচে—সব দিকেই তাকিয়ে দেখি, কিন্তু জন-প্রাণীকেও দেখতে পাই না,—অথচ ভয় যায় না, গায়ে কাঁটা দিয়ে ওঠে, থেকে থেকে চমকে দাঁড়িয়ে পড়ি । এ যে আমাদের মনের মিথ্যে ভ্রম তাও তো বলতে পারি না, কারণ অবোধ পশু বাঘা,

সেই চলেতে চলেতে হঠাৎ স্থির হয়ে দাঁড়াচ্ছে, কাণ পেতে কি যেন শুনছে আর মাঝে মাঝে গৌঁ গৌঁ ক'রে গজ্জরে উঠেছে! স্পষ্ট দিনের আলোতেও যে এমন একটা অজানা আতঙ্ক মানুষের মনকে আচ্ছন্ন ক'রে দিতে পারে, আগে আমার সে বিশ্বাস মোটেই ছিল না!

এমনি ভয়ে-ভয়ে প্রায় ক্রোশখানেক পথ পার হয়ে একটা খোলা মাঠের ধারে এসে পড়লুম। সামনে থেকে গাছপালার সবুজ পর্দা স'রে গিয়ে দেখা দিলে এক অপূর্ব, কল্পনাতীত দৃশ্য।

মাঠের একপাশে আবার এক বিশাল হ্রদ—প্রভাত-সূর্যের মায়া-কিরণে তার অগাধ জলরাশি তরলিত মণিমাণিক্যের মতন বিচিত্র হয়ে উঠেছে। হ্রদের মাঝখানে ঠিক যেন ছবিতে-আঁকা, তরু-লতা-দিয়ে ঢাকা ছোট্ট একটি ছায়া-মাথা দ্বীপ এবং সেই দ্বীপের শ্যামলতা ভেদ ক'রে মাথা তুলে জেগে আছে পিরামিডের মতন একটি পাহাড়! সবচেয়ে অবাক ব্যাপার এই যে, পাহাড়ের বুকের ভিতর থেকে মাঝে মাঝে অসংখ্য আগুনের লক্কলকে শিখা ছ ছ ক'রে বাইরে বেরিয়ে আসছে—ঠিক যেন রাশি রাশি

মাস্তাকানন

অগ্নিময় সর্প মহাক্রোধে কোন্ এক অদৃশ্য শত্রুকে থেকে থেকে ছোবল মেরে আবার গর্ভের ভিতরে ঢুক য়াচ্ছে । হৃদের জলে সেই অগ্নি-লীলার ছায়া প'ড়ে দৃশ্যটাকে আরও চমকপ্রদ ক'রে তুলেছে !

আমরা বিশ্বয়ে স্তম্ভিত হয়ে দাঁড়িয়ে রইলুম—এমন অদ্ভুত দৃশ্য আর কখনো চোখে দেখিনি—এ দৃশ্য যেমন আশ্চর্য্য, তেমনি সুন্দর, তেমনি গস্তীর !

রামহরি হঠাৎ সেইখানে গুয়ে পড়ে দণ্ডবৎ হয়ে ভক্তিভরে প্রণাম করলে ।

আমি বললুম, “ওকি রামহরি, প্রণাম করলে কাকে ?”

রামহরি উঠে ব'সে বললে, “আজ্ঞে, দেবতাকে !”

—“দেবতা ! কোথায় দেবতা ?”

সম্ভ্রমের সঙ্গে পাহাড়ের দিকে আঙুল তুলে রামহরি বললে, “ঐ যে, দেবতা ঐখানে আছেন !”

আমি হেসে ফেলে বললুম, “ওটা তো আগ্নেয়-গিরি ! তোমার প্রণামটা যে বাজে খরচ হ'ল রামহরি !”

কিন্তু রামহরি আমার কথায় বিশ্বাস করলে না । তাড়াতাড়ি দ্বিভ কেটে বললে, “ছি ছি, অমন কথা

বলবেন না বাবু ! ইংজিরি কেতাব পড়ে আপনারা সব ক্রিষ্টান হয়ে গেছেন, দেবতা-টেবতা মানেন না, সেই পাপেই তো এত বিপদে পড়ছেন ! ওখানে মহাদেব আছেন, ও আগুন যে তাঁরই চোখের আগুন—ঐ আগুনেই তো মদন ভস্ম হয়েছিল ! হে বাবা মহাদেব, তুমি আমার বাবুদের অপরাধ নিও না বাবা ” বলে আবার সে মাটির উপরে ভক্তিভরে কপাল ঠুকতে লাগল ।

বিমলের কিন্তু এ-সব কিছুই ভালো লাগছিল না, সে অস্থির ভাবে বারকয়েক এদিকে-ওদিকে ঘোরাঘুরি ক’রে আমার কাছে এসে বললে, “এখনো তো কুমার আর কমলের কোনই খোঁজ পাওয়া গেল না ।”

আমি বললুম, “না । কিন্তু আমার বিশ্বাস, তারা এই বনের ভেতরেই আছে ।”

বিমল নিরাশ কণ্ঠে বললে, “আমার বিশ্বাস, তারা আর বেঁচে নেই ! বিনয়বাবু, তাদের এই অকাল মৃত্যুর জন্যে আমরাই দায়ী । গুহার ভেতরে নিরস্ত্র অবস্থায় তাদের যদি ফেলে না রেখে যেতুম, তা’হলে কখনোই এমন দুর্ঘটনা ঘটত না—”

আচম্বিতে বাঘা চোঁচিয়ে উঠল, আমি চোখের পলকে

স্বাক্ষর

ফিরে দাঁড়ান! ও আবার কি দৃশ্য? প্রকাণ্ড এক গাছের তলায় সারি সারি ওরা কারা এসে দাঁড়িয়েছে? মানুষের মত তারা দাঁড়িয়ে আছে, মানুষের মতন তাদের হাত-পা-দেহ—কিন্তু তারা মানুষ নয়! যাহুঘরে আমি গরিলার মূর্তি দেখেছি, এদেরও দেখতে অনেকটা সেই রকম, কিন্তু এরা গরিলাও নয়! এদের রং কালো, গায়ে বড় বড় লোম, হাতগুলো এত লম্বা যে প্রায় হাঁটুর কাছে এসে পড়েছে! দেহের তুলনায় এদের মাথাগুলো ছোট ছোট, মুখ-শ্রী প্রায় মানুষের মতন বটে, কিন্তু ভয়ানক কুৎসিত, নাক চ্যাপ্টা, আর মুখের আধখানা দাড়ী-গোঁফে ঢাকা! এদের চেহারা মানুষ আর বন-মানুষের মাঝামাঝি! পণ্ডিতেরা যে বানর-মানুষের কথা লিখেছেন, তবে কি এরা তাই?

পার্শ্বের আর-একটা গাছের ডাল-পাতার ভিতর থেকে ঝুপ্ ঝুপ্ করে আরো অনেকগুলো বানর-মানুষ পৃথিবীর উপরে অবতীর্ণ হ'ল—প্রত্যেকেরই হাতে এক একগাছা মোটা লাঠি! তারপর আর একটা গাছ থেকে আরো কতকগুলো জীব মাটির উপরে এসে দাঁড়াল—এমনি করে তারা ক্রমেই দলে ভারি হয়ে উঠতে লাগল!

আমি বললুম, “বিমল, এরাই হচ্ছে মানুষের পূর্ব-
পুরুষ। কিন্তু এরা বোধ হয় আমাদের আক্রমণ করতে
চায়।”

বিমল কোন জবাব না দিয়ে বন্দুকটা কাঁধের উপর
থেকে নামিয়ে, দেশ ক’রে বাগিয়ে ধরলে।

ষোলো

অতিকার শ্রুতি

এই বানর-মানুষরা যে আমাদের আক্রমণ করতে চায়, সে বিষয়ে আর কোনই সন্দেহ রইল না। কারণ ক্রমে ক্রমে দলে ভারি হ'য়ে তারা আমাদের একেবারে ঘিরে ফেলবার চেষ্টা করলে! তারা নানান রকম অঙ্গভঙ্গী ও চীৎকার ক'রে কি-সব বলতে লাগল, সেগুলো অর্থহীন শব্দ, অথবা তাদের ভাষা, তাও বুঝতে পারলুম না!

আমি বললুম, “বিমল, যদি বাঁচতে চাও, দৌড়ে ঐ হ্রদের ধারে চল! নইলে এরা আমাদের একেবারে ঘিরে ফেললে আর বাঁচবার উপায় থাকবে না!”

বিমল বললে, “হঁ!”

কিন্তু বানর-মানুষরাও বোধ হয় আমাদের উদ্দেশ্য বুঝে ফেললে! কারণ আমরা হ্রদের দিকে ফিরতে না

'ফির্তেই ভয়ানক চীৎকারে আকাশ কাঁপিয়ে তারা আমাদের আক্রমণ করলে !

সঙ্গে সঙ্গে বিমলও কিছুমাত্র ইতস্ততঃ না ক'রে বন্দুক ছুঁড়লে, আমিও আমার বন্দুকের ঘোড়া টিপলুম— অব্যর্থ লক্ষ্যে ছুটো জীব তৎক্ষণাৎ মাটির উপরে হাত-পা ছড়িয়ে আছড়ে পড়ে ছটফট করতে লাগল !

বন্দুকের গর্জনে আর সঙ্গী দুজনের অবস্থা দেখে বাকি বানর-মানুষগুলো হতভয় ও মূর্তির মতন নিশ্চল হয়ে দাঁড়িয়ে পড়ল ! জীবনে তারা আগেই অস্ত্র কখনো তো চোখে দেখেনি, কোন্ মায়ামন্ত্রে আমরা যে তাদের ছুই সঙ্গীর অমন ছরবস্থা করলুম এটা বুঝতে না পেরে ভয়ে ও বিস্ময়ে নিশ্চয় তারা অবাক হয়ে গেল ।

সেই ফাঁকে আমরা হৃদের দিকে ছুট দিলুম । প্রায় যখন জলের কাছাকাছি এসে পড়েছি, তখন আবার আর এক বিপদ ।.....হৃদের উপরে কয়েক খানা ছিপের মতন লম্বা নৌকো ভাসছে এবং প্রত্যেক নৌকার মধ্যে মানুষের মতন . দেখতে অনেকগুলো ক'রে লোক !

মাস্তাকানন

নৌকাগুলো বেগে তীরের—অর্থাৎ আমাদের—
দিকে ছুটে আসছে ! নিশ্চয় আরো একদল বানর-
মানুষ জলপথ আগলে আছে ! ভেবেছিলুম সাঁত্রে
হৃদের ঐ দ্বীপে গিয়ে উঠে প্রাণ বাঁচাব, কিন্তু এখন
দেখছি সে পথও বন্ধ !

পিছনে ফিরে দেখি, মাঠের উপরের বানর-মানুষদের
দল আরো-পুরু হয়ে উঠেছে ! আহত সঙ্গী হুজনের
চারপাশ ঘিরে তাদের অনেকে উত্তেজিত ভাবে
অঙ্গভঙ্গী করছে,—অনেকে আবার আমাদের লক্ষ্য ক’রে
বিকট স্বরে চীৎকার ও লাঠি আশ্ফালন করতেও
ছাড়ছে না !

আমাদের তরফ থেকে বাঘাও লাঙ্গুল আশ্ফালন
ক’রে তাদের চীৎকারের উত্তর দিতে লাগল !

রামহরি বললে, “বাবু, এখন আমরা কোন্ দিকে
যাই ?”

বিমল বললে, “আবার বনের ভেতর চল । সেখানে
হয়তো লুকোবার একটা জায়গা পাওয়া যেতে পারে ।”

তা ছাড়া আর উপায়ও নেই । বিশেষ, বনের
ভিতরে আত্মরক্ষারও সুবিধা বেশী । বন খুব কাছেই
ছিল, আমরা আবার ছুটে তার মধ্যে গিয়ে ঢুকলুম—

মাঠ ও নৌকো থেকে শক্ররা উচ্চস্বরে চীৎকার ক'রে উঠল।

একটা কোন গোপন স্থান খোঁজবার জন্তে আমরা বনের চারিদিকে ছুটাছুটি করতে লাগলুম। কিন্তু সেখানে আবার এক নূতন আতঙ্ক! লুকোবার ঠাই খুঁজতে খুঁজতে হঠাৎ বনের এক জায়গায় দেখি, দোতারা বাড়ীর চেয়েও উঁচু একটা অতিকায় ভীষণ জানোয়ার দুই পা ছড়িয়ে ব'সে আছে এবং দুই হাত বাড়িয়ে মস্ত একটা গাছ অতি অনায়াসে মড়্ মড়্ ক'রে ভেঙে ফেলছে। দেখতে তাকে অনেকটা ভাল্লুক ও বনমানুষের মাঝামাঝি।

বিস্ময়-স্তম্ভিত নেত্রে বিমল বললে, “ওকি সর্ব্বনেশে জন্তু?”

আমি বললুম, “অতিকায় শ্লথ্!”

—“ও যদি আমাদের দেখতে পায়, তাহ'লে যে আর রক্ষে থাকবে না!”

—“এর চেয়ে যে বানর-মানুষদের সঙ্গে লড়াই করা ভালো! এস, এস, পালিয়ে এস!”

ভয়ে কাঁপতে কাঁপতে আবার বনের ভিতর থেকে বেরিয়ে এলুম।

মায়াকানন

রামহরি বললে, “যে দিকে চাই সেই দিকেই বিপদ, এবারে সত্যিই বুঝি প্রাণটা গেল !”

বিমল হেসে বললে, “কই রামহরি, তোমার মহাদেবকে আর ডাকচ না কেন ? আর একবার ডেকে দেখ, যদি তিনি এ বিপদ থেকে আমাদের উদ্ধার করতে পারেন !”

রামহরি রেগে বললে, “মরতে বসেচ খোকা-বাবু, এখনো দেবতা নিয়ে হাসি-ঠাট্টা। হে বাবা মহাদেব ! খোকাবাবু ছেলেমানুষ, তার অপরাধ ক্ষমা কর”— ব’লেই হাত জোড় ক’রে কপালে ছোঁয়ালে !

বিমল বললে, “কিন্তু কি আশ্চর্য্য, বানর-মানুষ গুলো অবাক হয়ে কি দেখচে ? ওরা যে এখনো আমাদের আর আক্রমণ করলে না ? ওরা কি আমাদের বন্দুকের ভয়েই আর এগুচ্ছে না ?”

আমি বললুম, “ওরা সবাই হৃদের নৌকোগুলোর দিকেই তাকিয়ে আছে ! বোধ হয় ওরা নৌকোগুলো ডাঙায় আসার জন্তে অপেক্ষা করচে ! নৌকো ডাঙায় এলেই ওরা একসঙ্গে দুই দিক থেকে আমাদের আক্রমণ করবে !”

বিমল বললে, “নৌকোর ওপরেও গুলি চালাব নাকি ?”

—“না, নৌকোগুলো এখনো দূরে আছে, বন্দুক ছুঁড়লে হয়তো ফল হবে না। বন্দুক যদি ছুঁড়তে হয় তো মাঠের দিকেই ছোঁড়ো, আরো দু-একজন মরলে বাকি বানর-মানুষগুলো ভয়ে পালিয়ে যেতে পারে !”

—“তাই ভালো।”

আমরা দুজনেই শত্রুদের লক্ষ্য ক’রে বার কয়েক বন্দুক ছুঁড়লুম। যা ভেবেছি তাই! বন্দুকের মারাত্মক শক্তি দেখে অনেকগুলো বানর-মানুষ লাফ মেরে আবার গাছের উপরে উঠে ঘন পাতার আড়ালে অদৃশ্য হ’য়ে গেল, অনেকে বনের ভিতরে ঢুকে পড়ল, মাঠের উপরে রইল খালি পাঁচ-ছয়টা আহত বা মৃত দেহ। কিন্তু শত্রুদের ঘন ঘন চীৎকার শুনেই বুঝলুম, তারা আমাদের আশা একেবারে ত্যাগ ক’রে পালিয়ে যায়নি — আড়ালে আড়ালে ওৎ পেতে বসে আছে।

হৃদের দিকে তাকিয়ে বিমল বললে, “এইবারে এদের ব্যবস্থা করতে হবে।”

—“কিন্তু বিমল, নৌকোর ওপরে ওরা কারা রয়েছে ? ওদের তো বানর-মানুষ ব’লে মনে হচ্ছে না।”

মাস্তাকানন

—“হ্যাঁ, তাইতো ! ওরা তো বানর-মানুষদের মতন
ল্যাংটো নয়—ওদের পরোণে জামা-কাপড়ের মতন কি
যেন রয়েছে না ?”

—“হ্যাঁ।—বোধ হয় ওরা আমাদেরই মতন
মানুষ !”

—“সংখ্যায় তো দেখছি ওরা চল্লিশ-পঞ্চাশ জনের
কম নয় ! তাহ’লে এখানে আমরা ছাড়া আরো মানুষ
আছে ! কিন্তু কি মংলোবে ওরা আমাদের কাছে
আসচে ? ওরা শত্রু না মিত্র ?”

—“কিছুই তো বুঝতে পারছি না ! হয়তো ওরা
অসভ্য মানুষ, হৃদের ঐ ঘোঁপে থাকে।”

নৌকোগুলো ডাঙার খুব কাছে এসে পড়ল।
একখানা নৌকোর উপরে হঠাৎ দুজন লোক দাঁড়িয়ে
উঠল এবং দুহাত তুলে চীৎকার ক’রে ডাকলে—
“বিমল ! রামহরি ! বিনয়বাবু ! বাঘা !”

শুনেই বাঘা তীরের মত হৃদের দিকে ছুটে গেল !
আনন্দে আমাদেরও বুক যেন নেচে উঠল—এ যে কুমার
আর কমলের গলা !

আমরাও এক দৌড়ে হৃদের ধারে গিয়ে দাঁড়ালুম—
সঙ্গে সঙ্গে একখানা নৌকো থেকে কুমার আর কমল

ডাঙায় লাফিয়ে পড়ল এবং বাকি নোকোগুলো থেকেও উল্লসিত কণ্ঠে উচ্চ চীৎকার শুনলুম—“বিনয়বাবু, বিনয়বাবু !”

আনন্দের প্রথম আবেগ সামলে দেখি, আমাদের চারপাশে হাসিমুখে দাঁড়িয়ে আছে যারা, তারা কেউই অচেনা লোক নয় ! তারা হচ্ছে আমাদেরই দেশের লোক, মঙ্গল-গ্রহের বামনরা বিলাসপুর থেকে তাদের বন্দী ক’রে নিয়ে গিয়েছিল এবং এই দ্বীপে এসেই তাদের সঙ্গে আমাদের প্রথম ছাড়াছাড়ি হয় ! পাঠকরা নিশ্চয়ই তাদের কথা ভুলে যান নি !

মনের আনন্দে আমরা যখন কথাবাত্তায় বিভোর হয়ে আছি, আচম্বিতে মাঠের দিক থেকে বিষম একটা গোলমাল শোনা গেল । ফিরে দেখি, বনের নানাদিক থেকে পিল-পিল ক’রে দলে দলে বানর-মানুষ বেরিয়ে আসছে ! দেখতে-দেখতে হাজার-হাজার বানর-মানুষে মাঠের একদিক একেবারে ভ’রে গেল ! হঠাৎ ভীষণ হুলা ক’রে তারা একসঙ্গে আবার আমাদের আক্রমণ করতে অগ্রসর হ’ল ।

বিমলও আবার বন্দুক তুলে ফিরে দাঁড়াল ।

কুমার বললে, “মিছে গোলমাল বাড়িয়ে লাভ নেই

মাস্তাকানন

বিমল ! এস, আমরা নৌকোয় গিয়ে চড়িগে ! ওরা সঁতার জানে না, জলকে বড় ভয় করে !”

আমি সায় দিয়ে বললুম, “হ্যাঁ, সেই কথাই ভালো । ওদের সঙ্গে লড়াই করতে গিয়ে যদি আমাদের কেউ মারা পড়ে, তাহলে আজকের এই মিলনের আনন্দ অনেকখানি ম্লান হয়ে যাবে ।”

আমরা সকলে মিলে তাড়াতাড়ি নৌকোর উপরে গিয়ে উঠে বসলুম । বানর-মানুষরা যখন হ্রদের ধারে এসে দাঁড়াল, আমাদের নৌকোগুলো তখন তাদের নাগালের বাইরে গিয়ে পড়েছে । নিষ্ফল আক্রোশে আমাদের লক্ষ্য করে তারা কতকগুলো বড় বড় পাথর বৃষ্টি করলে, কিন্তু সেগুলো আমাদের কাছ পর্যন্ত এসে পৌঁছলো না । উত্তরে আমরাও বন্দুক ছুঁড়লে বানর-মানুষদের আরো কিছু শিক্ষা হ'ত বটে, কিন্তু আমাদের আর বন্দুকের টোটা নষ্ট করতে প্রবৃত্তি হ'ল না ।

নৌকোগুলো হ্রদের সেই ছীপের দিকে ভেসে চলল ।

আমি বললুম, “কুমার, তোমরা কি ক'রে এখানে এলে সে কথা তো কিছুই বললে না ?”

কুমার বললে, “আচ্ছা শুনুন, খুব সংক্ষেপে বলে
 যাকি।...আপনারা যেদিন শিকারের খোঁজে বেরিয়ে
 গেলেন, সেইদিন রাত্রেই ঐ বনমানুষগুলো আমাদের
 আক্রমণ করে। ওরা যে কি ক’রে আমাদের খোঁজ
 পেলে তা আমি জানি না। তাদের সেই হঠাৎ
 আক্রমণে আমরা একেবারে কাবু হয়ে পড়লুম। লাঠির
 ঘায়ে আমার মাথা ফেটে গেল, বাঘাও রীতিমত জখম
 হ’ল। তারপরে তারা আমাকে আর কমলকে নিয়ে
 নিজেদের বাসায় ফিরে এল। আমাদের নিয়ে ওরা
 যে কি করত তাও বলতে পারি না। তবে হাত-পা
 বাঁধা অবস্থায় একদিন আমরা একটা গাছতলায় প’ড়ে
 রইলুম। বনমানুষগুলো বড় বড় গাছের উপরে লতা-
 পাতা ডাল দিয়ে ছোট ছোট কুঁড়ে ঘর বানিয়ে বাস
 করে। দ্বিতীয় দিন রাত্রে যখন তারা গাছের উপরে
 ঘুমে অচেতন, আমি তখন কোনরকমে পকেট থেকে
 আমার ছুরিখানা বার করলুম। তারপর ছুরিখানা
 দাঁতে চেপে ধ’রে আগে কমলের বাঁধন কেটে দিলুম,
 তারপর কমল আমাকে মুক্ত করলে। শক্ররা টের
 পাবার আগেই আমরা পালিয়ে এই হ্রদের ধারে এসে
 উপস্থিত হলুম, তারপর সাঁতার দিয়ে একেবারে ঐ

স্বাক্ষর

দ্বীপে গিয়ে উঠলুম। ওখানে এই পুরাণো বন্ধুদের সঙ্গে দেখা!”

আমি জিজ্ঞাসা করলুম, “কিন্তু ওরা কি ক’রে ওখানে এল?”

কুমার বললে, “সে অনেক কথা। দ্বীপে গিয়ে শুনবেন। আজ বন্ধুদের আয়োজিত শুনেই আমরা বুঝতে পেরেছিলুম যে, আমাদের খোঁজে আপনারা এখানে এসেছেন!”

কে যেন আকাশের নীলিমাকে নিংড়ে হৃদের জলে গুলে দিয়েছে,—কী স্বচ্ছ নীল তার রং! তার তলা পর্যন্ত সূর্যদেবের কিরণ-প্রদীপ জ্বল্ জ্বল্ ক’রে জ্বলছে এবং কত রকমের মাছ যে সেখানে খেলা ক’রে বেড়াচ্ছে, তাও স্পষ্ট দেখতে পাওয়া যাচ্ছে!

আগ্নেয় গিরির আগুন-জিভগুলো এখন আমাদের চোখের খুব কাছেই লক্ লক্ ক’রে উঠছে এবং গাছের পর গাছের সবুজ আঁচলে-ঢাকা সেই ছায়া-নাচানো দ্বীপটিও একেবারে আমাদের কোলের সামনে এসে পড়েছে!.....তার পরেই আমাদের নৌকাগুলো একে একে তীরে গিয়ে ভিড়ল।

দ্বীপে যে লোকগুলি আশ্রয় নিয়েছে তাদের সর্দার

ছিল সোনাউল্লা। দ্বীপে নেমে আমাকে সেলাম ঠুকে
সে বললে, “বাবুজী, আজ আগেই আপনাদের
খাওয়া-দাওয়ার বন্দোবস্ত করতে হবে তো?”

—“হ্যাঁ সোনাউল্লা, তাহ'লে বড় ভালো হয়—
আমাদের ভারি ক্ষিদে পেয়েছে। তুমি তাড়াতাড়ি
যাহোক কিছু রেঁধে আমাদের খাইয়ে দাও!”

—“কিন্তু বাবুজী, আমরা যে মুসলমান!”

—“ভাই সোনাউল্লা, আমরা এখন ভগবানের
নিজের রাজত্বে বাস করছি.....হয়তো এইখানেই
আমাদের চিরকাল বাস করতে হবে। এখানে কেউ
হিন্দুও নয়, কেউ মুসলমানও নয়—এখানে শুধু এক
জাত আছে, সে হচ্ছে মানুষ-জাত। দলাদলিতে মানুষ
যে-সব জাতের সৃষ্টি করেছে এখানে আমরা তা মানব
না। তুমি যাও সোনাউল্লা, আগে তোমার হাতের
রান্না খেয়ে পেট ঠাণ্ডা করি, তারপর তোমাদের কাহিনী
শুনব।”

সতেরো

খাঁড়া-দেঁতো বাঘ

আহারাদির পর একটা গাছতলায় পা ছড়িয়ে বসে সোনাউল্লার কাহিনী শুনতে লাগলুম :—

“বাবুজী, বামনদের উড়োজাহাজ যেদিন আবার পৃথিবীতে এসে নামল, আমাদের আর আনন্দের সীমা রইল না। তাই আপনারা উড়োজাহাজ ছেড়ে যখন নেমে গেলেন, তখন আমরাও আর থাকতে না পেরে নীচে নেমে পড়লুম। এই ফাঁকে বামনরা যে পালাতে পারে, মনের আনন্দে কারুরই আর সে কথা মনে রইল না।

আপনাদের বোধ হয় স্মরণ আছে, তখনো ভালো ক’রে ভোর হয়নি। মনের খুসিতে নাচতে নাচতে, লাফাতে লাফাতে, ট্যাচাতে ট্যাচাতে আমরা চারিদিকে ছুটাছুটি করতে লাগলুম। বললে আপনারা বিশ্বাস করবেন না, ঠিক সেই সময়ে

ভয়ানক একটা কাণ্ড ঘটল। আধা-আলোয় আধা-
অঁধারে জঙ্গলের ভিতর থেকে হঠাৎ প্রকাণ্ড কি একটা
বেরিয়া এল,—আমাদের মনে হ'ল যেন একটা পাহাড়
লাফাতে লাফাতে ছুটে আসছে।

প্রথমটা আমরা আতঙ্কে স্তম্ভিত হয়ে দাঁড়িয়ে
রইলুম, তারপরে পাগলের মতন সকলে মিলে ছুটে
লাগলুম। সেই রাক্ষসটাও যে আমাদের পিছনে পিছনে
ভেড়ে আসছে, তার পৃথিবী-কাঁপানো পায়ের শব্দ শুনেই
সেটা বেশ বুঝতে পারলুম। মাঝে মাঝে মানুষের
কাত্‌রানিও শোনা যেতে লাগল—নিশ্চয়ই আমাদের
দলের কেউ কেউ তার কবলে গিয়ে পড়েছে।

আরো-বেশী ভয় পেয়ে আমরা আরো-বেশী বেগে
দৌড়তে লাগলুম। কিন্তু পিছনের সেই বিষম পায়ের
শব্দ আর কিছুতেই যেন থামতে চায় না! এমনি ছুটে
ছুটে বন-বাঁদাড় ভেঙে আমরা যখন এই হ্রদের
ওদিককার তীরে এসে পড়লুম, তখন আমাদের দম
প্রায় অঁটকে যাবার মত হয়েছে। আমরা সেইখানেই
কেউ বঁসে আর কেউ শুয়ে প'ড়ে জিরুতে লাগলুম।
কিন্তু বেশীক্ষণ জিরুতে হ'ল না, হঠাৎ বাজের মতন এক
ভীষণ চীৎকার শুনে ফিরে দেখি, সেই পাহাড়ের মত

মাস্তাকানন

উঁচু রাক্ষসটা বনের ভিতর থেকে আবার বেরিয়ে আসছে ! আমরা সকলে তখনি হৃদের জলে ঝাঁপ দিলুম । আমাদের ভিতরে তিন-চার জন লোক সাঁতার জানত না, সে বেচারীরা একেবারে তলিয়ে গেল !

সেই সর্বশেষে জীবটা লাফাতে লাফাতে জলের ধার পর্য্যন্ত এল । তারপর এতগুলো শিকার হাতছাড়া হয়ে গেল দেখে, মনের ছুঁখে আকাশপানে মুখ তুলে ভয়ানক চ্যাচামেচি শুরু ক'রে দিলে !

অনেককক্ষণ সাঁতার কেটে আমরা শেষে এই দ্বীপে এসে উঠলুম ।

এখানে এসে প্রথম কয়দিন আমরা বনের ফলমূল খেয়ে কাটিয়ে দিলুম । তারপর হঠাৎ একদিন একরকম আশ্চর্য্য হাঁসের বাসার খোঁজ পেলুম—সে হাঁসদের ডানা নেই । তারপর থেকে ফলমূলের সঙ্গে সেই হাঁসের মাংস আর ডিম পেয়ে এখন আর আমাদের পেটের ভাবনা ভাবতে হয় না ।

কি বলছেন ? আগুন কোথায় পেলুম ? সেও বড় অবাক কারখানা, বাবুজী ! ঐ যে পাহাড় দেখছেন, দিন-রাত ওর ভেতরে আগুন জ্বলছে । আমরা ঐখান থেকেই আগুন আনি ।

আবার এই দেখুন, পাথর ঘ'ষে ঘ'ষে আমরা কেমন সব বর্ষার ফলা, তাঁর আর ছুরি-ছোরা-কুড়ুল তৈরি করেছি। অস্ত্রগুলোতে কেমন ধার হয়েছে, দেখছেন তো ? এই-সব ছুরি আর কুড়ুল দিয়ে গাছ কেটে ক'খানা ছিপও বানিয়ে ফেলেছি, এখন দরকার হ'লে জলের উপরেও আনাগোনা করতে পারি ! খোদাতালার দয়ায় আমাদের আর অন্য কোন কষ্ট নেই বটে, কিন্তু আজ ক'দিন থেকে নতুন এক বিপদ উপস্থিত হয়েছে !

রোজ রাতে কি-একটা অদ্ভুত জন্তু আমাদের সন্ধান পেয়ে বেজায় উৎপাত শুরু করেছে ! এর-মধ্যেই সে আমাদের দল থেকে পাঁচজন লোককে ধ'রে নিয়ে গেছে,—আমরা কিছুতেই তার হাত থেকে ছাড়ান্ পাচ্ছি না। এক রাতে তাঁদের আলোয় জন্তুটাকে আমি দেখেছি। দেখতে তাকে বাঘের মত বটে, কিন্তু সে বাঘ নয়। কারণ বাঘের চেয়েও সে ঢের বেশী বড়, আর তার মুখের ছিদিকে হাতীর মত ছোটো দাঁত আছে !

কি বললেন বাবুজী ? সেকেন্দ্রে খাঁড়া-দেঁতো বাঘ ? সে আবার কি রকম বাঘ ?

স্বাক্ষর

তা সে বাঘই হোক আর যাইই হোক, আমাদের
আর এ দ্বীপে থাকা পোষাবে না। এই বেলা প্রাণ
নিয়ে এখান থেকে না পালালে একে একে সবাইকেই
মরতে হবে! এখান থেকে কোথায় যাই, বলতে
পারেন ?”

আঠারো

জাহাজ ! জাহাজ !

সোনাউল্লার গল্প শেষ হ'লে বিমল বললে,
“সোনাউল্লা, তোমাদের বাহাছরি আছে বটে ! এই
সৃষ্টিছাড়া মূল্যকে তোমরা এমন ক'রে সংসার পেতে
নিয়েচ !”

সোনাউল্লা দাড়ীতে হাত বুলোতে বুলোতে বললে,
“কিন্তু বাবুজী, এ সংসার আবার আমাদের তুলতে
হবে ! নইলে ঐ খাঁড়া-দেঁতো বাঘ নিশ্চয়ই আমাদের
ফলার ক'রে ফেলবে !”

আমি বল্লুম, “আচ্ছা সোনাউল্লা, তোমরা এক কাজ
করনা কেন ? আমরা যে গুহায় এতদিন ছিলাম, সে
গুহাটা খুব বড় আর নিরাপদ। তার ভেতরে
অনায়াসে একশো জনের ঠাই হতে পারে। চল,
আমরা সকলে মিলে সেইখানে আবার ফিরে যাই !”

মাস্তাকানন

সোনাউল্লা বললে, “সে ঠাঁই এখন থেকে কত দূরে বাবুজী ?”

আমি বললুম, “তা ঠিক করে বলতে পারি না। তবে আমরা যে পাহাড়ে থাকি; তার উপরে চড়ে দেখি এখানে এই একটি বৈ দ্বীপ নেই। তা যদি হয় তাহ’লে আমরা নৌকায় চড়ে পূর্বদিকের ঐ জঙ্গলের কাছে গিয়ে নামলেই পাহাড়ের খুব কাছে গিয়ে পড়ব।”

সোনাউল্লা বললে, “তাহলে সেই কথাই ভালো। আমরা কাল সকালেই এখন থেকে পালাব। সকলকে খবরটা দিয়ে আসি”—এই বলে সে উঠে গেল।

রামহরি মুখ ভার ক’রে বললে, “এদের দলে মোছলমানই বেশী। গুহার ভেতরে এতগুলো মোছলমানের সঙ্গে থাকলে আমাদের যে জাত যাবে বাবু!”

আমি বললুম, “এতই যদি জাতের ভয়, তাহ’লে আজ এদের হাতের রান্না মাংস কি করে খেলে রামহরি ?”

—“কে বললে আমি মাংস খেয়েচি ? সব আমি লুকিয়ে বাঘাকে দিয়েচি। আমি খালি ফলমূল খেয়ে আছি!”

বিমল হাসতে হাসতে বললে, “তাহ’লে তুমি এক কাজ কর রামহরি ! আমরা আমাদের গুহায় ফিরে যাই, আর তুমি একলা এখানে বাস কর । এই ছীপে তোমার যে মহাদেব আছেন, তুমি রোজ প্রাণ ভরে তাঁর পূজা করতে পারবে আর তোমার জাতও রক্ষা পাবে !”

—“কি যে হাসো খোকাবাবু, সব ব্যাপারের ঠাট্টা আমার ভালো লাগে না”—বলতে বলতে রামহরি রাগে গস্ গস্ করতে করতে সেখান থেকে উঠে গেল !”

...

...

...

পরদিন সকালেই আমরা ছিপে চ’ড়ে বেরিয়ে পড়লুম ।

অনেকক্ষণ পরে আমরা যেখানে গিয়ে থামলুম ঠিক তার সামনেই সেই ভয়াবহ অরণ্য, যার ভিতরে পথ হারিয়ে আমাদের প্রাণ প্রায় যায় যায় হয়ে উঠেছিল ।

সেইখানে আমরা ছিপ্ ছেড়ে নেমে পড়লুম । ডাঙায় উঠে বালুকা-প্রান্তরের দিকে তাকিয়েই আমি দেখতে পেলুম, দূরে সমুদ্রের ধারে আমাদের আশ্রয়-স্থান সেই সুপরিচিত পাহাড়টি .আকাশ পানে মাথা তুলে দাঁড়িয়ে আছে ।

মাস্তাকানন

ঘণ্টা দুই পরে আমরা আবার আমাদের সেই পুরাতন গুহার মধ্যে ফিরে এলুম।

সেই দিন সন্ধ্যার সময়েই চারিদিক অন্ধকারে ডুবিয়ে ভীষণ এক ঝড় উঠল—তেমন ঝড় আগে কখনো দেখিনি। সাগরের অনন্ত বুক থেকে তরঙ্গের এমন এক অশ্রান্ত কান্না ভেসে এল যে, পৃথিবীর আর সমস্ত শব্দ যেন কোথায় তলিয়ে গেল। ঝড়ের দাপটে আমাদের পাহাড়টা পর্যন্ত থর থর ক’রে কাঁপতে লাগল।

আমি বললুম, “বিমল, এমনি এক ঝড়ই আমাদের এই দ্বীপের দিকে টেনে নিয়ে এনেছিল, মনে আছে কি!”

বিমল বললে, “মনে আছে বৈকি। সেদিনের কথা কি এ জীবনে আর ভুলতে পারব?”

কুমার বললে, “আজকের এই ঝড়টা, যদি দ্বীপটাকে আমাদের দেশের দিকে টেনে নিয়ে যেতে পারত!”

এমনি গল্প করতে করতে আর ঝড়ের হাহাকার শুনতে শুনতে আমরা একে একে ঘুমিয়ে পড়লুম।.....

হঠাৎ অনেকের চীৎকারে আর টানাটানিতে আমার

ঘুম ভেঙে গেল—শুনলুম কমল চীৎকার ক'রে বলছে,
“বিনয়বাবু—জাহাজ, জাহাজ !”

তাড়াতাড়ি উঠে ব'সে দেখি, গুহার ভিতরে ভোরের আলো এসে পড়েছে আর আমার পাশে বিমল, কুমার, কমল ও রামহরি অত্যন্ত উত্তেজিত মুখে দাঁড়িয়ে আছে ।

আমি জিজ্ঞাসা করলুম, “ব্যাপার কি, তোমরা এত গোলমাল করচ কেন ?”

বিমল বললে, “শীগ্গির উঠে আসুন বিনয়বাবু, দ্বীপের কাছে একখানা জাহাজ এসে নঙর ফেলেচে ।”

শুনেই এক লাফে উঠে দাঁড়ালুম, তারপর ছুটে গুহার বাইরে গিয়ে পুলকিত নেত্রে দেখলুম, আকাশে বাতাসে কোথাও আর ঝড়ের চিহ্ন নেই এবং নীল-সমুদ্রের উপরে একখানি লাল রঙের প্রকাণ্ড জাহাজ স্থির হয়ে দাঁড়িয়ে আছে !

চোখের সামনে, সেই জাহাজের গায়ের উপরে ফুটে উঠল—গঙ্গা-ধোয়া, আম-কাঁঠালের বন-দিয়ে-ঘেরা, কোকিল-পাপিয়া-ডাকা আমাদের বাংলা-দেশের আসল ছবি ।

উাশ .

ট্রাইশেরাটপ্‌স্

আনন্দের প্রথম আবেগটা কেটে গেলে পর সবাইকে ডেকে বললুম—“ভাই সব! আজ এতদিন পরে ভগবান আমাদের ওপরে মুখ তুলে চেয়েছেন! এতদিন পরে আবার আমাদের দেশে ফেরবার সুযোগ ঘটেচে, এমন সুযোগ গেলে আর পাব না! তোমরা সবাই মিলে চাঁৎকার কর, আমি আর বিমল সেই সঙ্গে বন্দুকের আওয়াজ করি। তাহ'লেই জাহাজের লোকেরা শুনতে পাবে।”

আমাদের দল এখন খুব ভারি। কাজেই সকলে মিলে যখন চাঁৎকার করতে লাগল, সারা আকাশটা যেন কেঁপে উঠল। তার উপরে আমার আর বিমলের বন্দুকের আওয়াজ!

হঠাৎ জাহাজ থেকেও বার-কয়েক বন্দুকের শব্দ হ'ল!

কমল আনন্দে লাফাতে-লাফাতে বললে, “শুনতে পেয়েচে! শুনতে পেয়েচে! জাহাজের লোকেরা আমাদের চীৎকার শুনতে পেয়েচে!”

কুমার বললে, “ঐ যে, জাহাজ থেকে দুখানা নৌকো নীচে নামিয়ে দিচ্ছে। ঐ যে, জনকয়েক লোকও দড়ীর সিঁড়ি বেয়ে নীচে নামচে।”

রামহরি বললে, “দেখে মনে হচ্ছে ওরা যেন জাহাজী গোরা।”

দুখানা নৌকো তীরের দিকে আসতে লাগল।

রামহরির কথাই সত্য। নৌকোর উপরে যারা রয়েছে, তারা সকলেই নীল পোষাক-পরা বিলাতী খালাসী।

নৌকো তীরের কাছে আসবামাত্র আমরা তাড়াতাড়ি তার কাছে ছুটে গেলুম। আজ কতদিন পরে পৃথিবীর নূতন লোকের সঙ্গে দেখা। সাহেব হ’লেও তাদের যেন ভাই ব’লে মনে হ’তে লাগল।

একজন সাহেব আমার কাছে এগিয়ে এলেন। তাঁর পোষাক দেখেই বুঝলুম, নিশ্চয়ই তিনি জাহাজের উচ্চপদস্থ কর্মচারী।

তিনি ইংরেজীতে আমাকে জিজ্ঞাসা করলেন,

মাস্তাকানন

“তোমাদের দেখে তো ভারতবর্ষের লোক ব’লে মনে
হচ্ছে ! কিন্তু আটলান্টিক মহাসাগরের এই অজানা
দ্বীপে তোমরা এলে কেমন ক’রে ? আমাদের জাহাজ
ঝড়ের তোড়েই এদিকে এসে পড়েছে, নইলে এ দ্বীপে
তো কখনো কোন জাহাজ থামে না !”

আমি বললুম, “সায়েব, আমরা মঙ্গলগ্রহে
ছিলুম, সেখানকার উড়োজাহাজে চ’ড়ে এখানে
এসেছি !”

—“কি বললে ? তোমরা মঙ্গলগ্রহে ছিলে ?”

—“হ্যাঁ, সায়েব !”

—“তুমি কি আমার সঙ্গে ঠাট্টা করচ ?”

—“না সায়েব ! বিশ্বাস না হয়, আমার সঙ্গীদের
জিজ্ঞাসা করুন !”

—“তা হ’লে তোমরা সবাই পাগল !”

—“হ্যাঁ সায়েব, প্রথমে আমাদের কথা পাগলের
প্রলাপ বলেই মনে হবে. বটে ! কিন্তু পরে আমাদের
সব কথা শুনলেই বুঝবে আমরা সত্যি বলছি কি না !
আপাততঃ আমরা আর কিছু চাই না, এ ভয়ানক দ্বীপ
থেকে আগে আমাদের উদ্ধার কর !”

—“এ দ্বীপকে ভয়ানক বলচ কেন ?”

• —“সাহেব, এখানে যে-সব ভীষণ জীবজন্তু আছে, তুমি স্বপ্নেও কখনো তাদের দেখনি !”

—“সে আবার কি ?”

—“এ দ্বীপের বাসিন্দা কারা জানো ? পাহাড়ের মতন উঁচু ডিপ্লোডোকাস আর ডাইনোসর, হাতীর মতন বড় বড় ষাঁড়, উড়ন্ত সরীসৃপ বা টেরোডাক্টাইল, খাঁড়াদেঁতো বাঘ, দানব শ্লথ—”

আমার কথা শেষ হবার আগেই সাহেব হো হো ক’রে হেসে উঠে বললেন, “থামো, থামো, আর পাগলামি কোরো না !”

—সেই সঙ্গেই গোরা খালাসীরা চারিদিক কাঁপিয়ে বিকট চীৎকার ক’রে উঠল !

ফিরে দেখি আমাদের কাছ থেকে খানিক তফাতেই একটা ছোটখাট বনের ভিতর থেকে সাহেবের ব্যঙ্গ-হাসির মূর্তিমান প্রতিবাদের মত কিস্তুকিমাকার প্রকাণ্ড এক জানেয়ার বেগে বেরিয়ে আসছে ! কেবলমাত্র তার মুখটাই বোধ হয় সাতফুটেরও চেয়ে বেশী লম্বা এবং তার মাথার উপরে ত্রিশূলের মতন তিনটে ধারালো শিং ও তার মুখখানা দেখতে যেন অনেকটা আমাদের জংঘাত্ত্রী দেবীর কাল্পনিক সিংহের

সাহসিকানন

মত ! তার চেহারা দেখে বুঝলুম সে হচ্ছে ট্রাই-শেরাটপ্‌স ।

সাহেব আর গোরা-খালামীরা চোখের পলক না ফেলতে এক ছুটে নৌকোর উপরে গিয়া উঠল এবং বলা বাহুল্য আমরাও সকলে গিয়ে নৌকার উপরে আশ্রয় নিতে কিছুমাত্র বিলম্ব করলুম না ! নৌকো দুখানা জাহাজের দিকে চলল, সাহেব আমার করমর্দন ক'রে বললেন, “তোমার কথায় অবিশ্বাস করেছিলুম ব'লে এখন আমি ক্ষমা চাইচি ! আজ যা দেখলুম, জীবনে আর ভুলব না !”

জাহাজ ছাড়ল,—মানুষের দেশে আবার আমাদের পৌঁছে দেবে ব'লে ! আবার যে স্বদেশে ফিরতে পারব, এই আনন্দে আমাদের সমস্ত মন যেন আকুল হয়ে উঠল !

কিন্তু ঠিক শেষ-মুহূর্তেই এই দানব-রাজ্যের কয়েকটি সুপরিচিত দূত আকাশ-পথে আর একবার আমাদের দেখা দিলে । তারা সেই গরুড়পাখী বা টেরোডাক্-টাইল । বিশ ফুট জুড়ে ডানা ছড়িয়ে তারা উড়ে যাচ্ছে দলে দলে !

যে ছুটে! পাখী আমাদের খুব কাছে ছিল, হঠাৎ

তাদের মধ্যে ঝগড়া বেধে গেল ! কি বিষম তাদের ঝটাপটি, কি কর্কশ তাদের চৌংকার !

জাহাজশুদ্ধ লোক ভয়ে ও বিস্ময়ে স্তম্ভিত হয়ে সেই অপূৰ্ব দৃশ্য দেখতে লাগল । অনেক গোরা-খালাসী হাঁটু গেড়ে বসে উপাসনায় প্রবৃত্ত হ'ল, একজন পাদ্রী তাঁর ক্রুশখানা উঁচু ক'রে তুলে ধরলেন—সকলের মুখ দেখে মনে হ'ল, নিশ্চয়ই তারা তাদের উড়ন্ত প্রেতাণ্ডা বা নরকের দূত ব'লে ধ'রে নিয়েছে ! স্ত্রীলোকেরা আর শিশুরা তো কেঁদেই অস্থির—কেউ কেউ মূর্চ্ছিতও হয়ে পড়ল !

এমনি ভয়, বিস্ময়, আর্তনাদের মধ্যে জাহাজ বেগে অগ্রসর হ'ল, গরুড়-পাখীরাও ধীরে ধীরে আবার অদৃশ্য হয়ে গেল । পাদ্রী-সাহেব বললেন, তাঁর পবিত্র ক্রুশ দেখেই সয়তানের দূতেরা ভয় পেয়ে আবার নরকে পালিয়ে গেল !

ময়নামতীর মায়াকানন ক্রমেই আকাশের নীলপটে মিলিয়ে যাচ্ছে, পাহাড়গুলোকে দূর থেকে দেখাচ্ছে চিত্রে-লেখা মেঘের মত ।

রামহরি বললে, “বাবু, দেখে ফিরে এবার আর আমি তোমাদের দলে ভিড়ব না !”

স্বাক্ষর

বিমল হেসে বললে, “কেন ?”

—“তোমরা সব করতে পারো বাবু ! আবার
কোনদিন হয়তো স্বর্গে যাবার বায়না ধরবে !
তোমাদের পায়ে দূর থেকেই নমস্কার ।”

বাঘার মাথা চাপড়ে কুমার বললে, “হ্যাঁরে বাঘা,
তোর কি মত ?”

বাঘা ল্যাজ নেড়ে জবাব দিলে, “ঘেউ, ঘেউ, ঘেউ !”

ইতি

ভোরের পুরবী (ফরাসী উপন্যাসের অনুবাদ)	১১০
সুচরিতা (রুস উপন্যাসের অনুবাদ)	১১০
প্রেমের প্রেমারা (মিনার্তা থিয়েটারে অভিনীত হাস্যনাট্য)	১৮০
পথের মেয়ে (যন্ত্রস্থ উপন্যাস)	
গানের মালা (যন্ত্রস্থ সঙ্গীত-সংগ্রহ)	

প্রাপ্তিস্থান :— ডি, এম, লাইব্রেরী

৬১, কর্ণওয়ালিস স্ট্রীট, কলিকাতা ।

শ্রীহেমেন্দ্রকুমার রায়ের গ্রন্থাবলী

আলেয়ার আলো (উপন্যাস)		১৮
জলের আল্পনা	৩	১১০
কালবৈশাখী	৩	১১০
পায়ের ধুলো	৩	২১
ঝড়ের যাত্রী	৩	২১
বেনোজল	৩	২১
পদ্মকাঁটা	৩	১০
ফুলশয্যা	৩	১০
রসকলি	৩	২১
ষকের ধন	৩	২১
খায়াকানন	৩	১০
মেঘদূতের মর্ত্তে আগমন (ঐ, যন্ত্রস্থ)		
মণিকাঞ্চন (উপন্যাস)		২১
পসরা (গল্পের বই)		১০
সিঁ ছুরচুপ্‌ড়ী	৩	১০
মধুপর্ক	৩	১০
মালাচন্দন	৩	১০
ষৌবনের গান (কবিতার বই)		১০
ওমর খৈয়ামের রুবায়ত (অসংখ্য চিত্র-সংবলিত)		৪১
ছুটির ঘণ্টা (বালক-পাঠ্য সচিত্র গল্পের বই)		১১

